

"أصل الحكاية"

فط الجمل من فوق كتافى ما أتلقى ...
بقلل ونخ وقام ببضك .. ياوله ...
إمتى النخيل يطرح بلح من غير نوا ..!
والسبع يضحك للطيور .. تلعب سوا ..!
ياخير مدد ...
ياخير مدد ...

أشعار بالعامية المصرية
شعر : كامل عيد رمضان
رسوم: عبد الباقي عامر

جميع حقوق الطبع محفوظة لمركز المحروسة

الطبعة الأولى يناير ١٩٩٩

اسم الديوان : أصل الحكاية
شعر : كامل عيد رمضان

الناشر : مركز المحروسة للبحوث والتدريب والنشر
٤ ش ٩ ب المعادي - ت: ٣٧٥٢٠٣٣

المدير العام : فريد زهران

الغلاف للفنان : حامد العويني

صف وإخراج : هشام صلاح

مسئول الطباعة : محمد سعيد

رقم الإيداع : ٩٨/١٧٠٩٥

الترقيم الدولي : I.S.B.N : 7 - 003 313 977

إهداء..

إلى روح أبى الذى ألهمنى روح الكلمة..

إلى شريكة رحلة الحياة، زوجتى الحبيبة..

إلى حبتنا العين والقلب . ابنتى^٧ أمل وأمانى..



المحتويات

٧	- كلمة المؤلف
١١	- كلمة لمصر
١٢	- ثلاث كلمات فى الحب
١٨	- أغنية للسويس
٢١	- ملايكة القرن العشرين
٢٥	- أصل الحكاية
٢٩	- أحلام الكلام
٣٢	- الربيع والنأى
٣٤	- حدوته مصرية
٣٨	- ألوان عصرية
٤١	- المزاد
٤٣	- الانتماء
٤٦	- غنوة قديمة
٤٨	- إمبراح ... لأ ...
٥١	- جواب من السويس
٥٦	- غنوة سويسى
٥٩	- أيوب السويس
٦٠	- الطريق والصحية
٦٢	- كلام لسيد درويش
٦٥	- ضحكتنى وش البلد
٦٨	- بيان مصرى ... ١٩٦٩
٧٠	- الشاعر والقضية
٧٢	- من مفكرة راجل سويسى
٧٥	- ثلاث حواديت من الجبهة
٧٨	- قصر الكلام
٧٩	- العهد
٨٠	- الفجر ع الطريق

٨١	- ريس البحرية
٨٣	- تسلم لنا
٨٤	- سؤال
٨٥	- صناع السد
٨٧	- حكايات السفر الطويل
٩١	- كلام للسويس
٩٣	- مشهد العبور "من أوبريت السويس حبيبتي"
٩٧	- السويس تغنى
١٠٠	- بيت القصيد
١٠١	- حكايتين للشعب
١٠٦	- خرزة فى عقد حب
١٠٨	- سلام بالحب
١١٠	- عزف منفرد
١١٤	- أذكركم فى عيد النصر
١١٧	- فى ذكرى ما جرى
١٢١	- مواويل للمواويل
١٢٦	- كلام فى الغربة
١٢٨	- دهاليز المونولوج
١٣١	- لغة العيون
١٣٣	- إلى الباحثين عن وظيفة عصرية
١٣٦	- الوشوشة على موسيقى الجاز
١٤٠	- البكاء للداخل
١٤٢	- إلى روح الصديق الفنان عبدالباقي عامر
١٤٥	- صفحات من هموم إنسان عربى
١٥٠	- السنين الميتة
١٥٦	- لما نتعلم ضميرها

كلمة المؤلف

أخي القارئ

هذه الأشعار التي بين يديك هي خلاصة تجارب وتسجيل حي لمراحل عشتها بمدينة "السويس". هذه المراحل هي مرحلة ما قبل حرب ١٩٦٧ ومرحلة ما بعد حرب ١٩٦٧ وحتى تحقيق نصر أكتوبر ١٩٧٣ وتأتي المرحلة الثالثة بعد ذلك وقد يكون إصدار هذا الديوان تأخر بعض الشيء بسبب صعوبات النشر، إلا أنه بحمد الله قدر له أن يرى النور ليأتي سجلا واقعا لسنوات الحلم التي عشناها وما واجهناه من صعوبات لتحقيق هذا الحلم.

ولقد عشت كل هذه المراحل وأنا الذائب في هوى مصو متشوقا ومتشوقا لحياة زارها الكرامة، في عالم انقلب في المعايير بتسيد الطفيليين وتواري الأصول. وكان الشعر هو مدخلي إلى هذا التشوف وهذا التشوق، ذلك أن الشعر في منظوري هو دفتر أحوالي .. أسجل فيه وجداني المتأزم وحالتي النفسية بحسب الأحداث .. وهو كذلك كتابي الذي أرتب فيه أفكارى وقاموسي الذي يحمل مفرداتي ويلدها كائنات تثرى وجودى وتدل عليه. وأنا في كل هذا أرى أن القصيدة وحده لا تتجزأ، فالقصيدة هي أنا .. وأنا هو ذاك العضو المنتمي لمجتمعه ذائبا فيه، يستنطق قلمه بأحوال هذا المجتمع وما تدور حوله هذه الأحوال .. سواء كانت حلما أو أمنية أو رفضا أو دمة أبت إلا أن تنسال نشيجا حارا على الورق.

وإننى لأرجو أن لا يعتب القارئ على ما جاء بقصائد "السويس" من عتاب وبكائيات، إذ كان لابد من مناقشة الذات في

تفاصيل ما حدث وكان لابد من البكاء .. وكان من الضروري
ايضا عتاب اللحظة والبحث عن دليل يفسر لنا غياب الحس
الإنساني عند البعض من الذين لم يستشعروا مدى المعاناة التي
يعيشها أبناء مدينة مصرية تقع في مرمى مدافع الأعداء. لقد كان
لابد لي كإبن من أبناء مدينة السويس من أن أوضح الصورة
الحقيقية التي عشناها في تلك الأيام، سواء كانت في قصيدة أو
في أغنية غناها لي "أولاد الأرض" هذه الأيام بكل ما فيها
من معاناة لم نفقدنا - ولو للحظة واحدة، الأمل في أننا سنعبّر
ونتخطى ألم المحنة .. وهذا المعنى واضح تماما في قصائدي
هنا.

وكلمة وفاء أود أن أقولها بصدق هنا: ما كان لهذا
الديوان أن يرى النور دون أن يحتوى رسوم صديقي الفنان
الراحل ابن السويس عبد الباقي عامر، الذي شاركني رحلة الحياة
بمدينة السويس وتقديرا مني لذكراه أردت بإصرار أن يخرج هذا
الديوان حاملا رسومه التي نفذها لمعظم قصائدي قبل رحيله
عنا، تغمده الله بواسع رحمته.

وأخيرا أرجو أن أكون قد وفيت بإصداري هذى
الأشعار، بعضا من ما أحمله في عنقي وضميري من فضل
وحب لمدينتي الحبيبة السويس ومصرنا الغالية.

كامل عيد رمضان

ساعات القلم ، بـيرْفُضُ خضوعه لنسخ الحروف..
ساعات الحروف ، بـترفض خضوعها لِسِنُ القلم..
ولكن في لحظةٍ بينسوا الخصام-
إذا الشمس هَلَّتْ ما بين الغمام..
.. وعَزَفَتْ نشيد الشعوب عَ الدفوف



كلمة لمصر

* واما تغنى يامصر ، فى الشعب ألمانك..
واما تتادى يامصر ، الكل خدامك..
بدموا الإيدى والقدم ، ويضحوا علشانك..
ويحببوا نجم الصباح يصلى فى مقامك..
يامعلمة الأيام فنون الحب...
يامعلمانا الصبر -
.. بنزد بعض الجميل من فضل إحسانك
* واما تقولى يامصر ، نتغنى بكلامك..
واما تشاورى يامصر ، جوانا أحلامك..
وع الطريق والدرب ، ندفى باحضائك-
نفتح ببيان بكرة ونمشى قدامك...
.. نخضر الزرعة
..نعطر المرعى
ونخلى شمس النهار تركع على قدامك...

١٩٧٦/١٠/٢٤

ثلاث كلمات فى الحب


١- السبب

* ولأنى بحب الناس
والناس بالناس تتحب...
ولأنى بحب الأرض سنابل حب..
وبحب الكلمة تخطى جدار الصمت..
ولأن مرايتى وشوش أطفال-
وبتضحك رغم الصعب..
ولأن العصر جبان وضيرير القلب..
ولأن .. وأن .. وأن.....
خطيت بالقلم الحرف ، كتبت الشعر..
يمكن يسمعى الناس - يحكوه...
.. يقولوه فى لحظة صدق!!
* * *

٢- على الرابة

* ماتسألوش من فىن ... الكلمة تجمعنا..
مأسعد الطالعين بالصدق والمعنى..
وما أتعس النازلين ، لم حسوا أوجاعنا..
أنا اللى إنت البرىء ، والكلام محسوب..
ماسك لجام الطريق ، وبافقط المكتوب..
والدنيا عندى الناس - قلوب وحاضنة قلوب-
.. زارعة الصحارى حياة ويتعزق الفدادين..
.

ماتسألوش من فين ، واستهلموا المعنى..
أنا اللي باضحك معاك..
وأنا اللي لجلك باموت .. ياشعب يابو الحكم..
أنا كلمة دايبة بهواك..
وأنا الغريب ع الشطوط ، والطوبة تحت الهرم..
وأنا اللي ابويا "النديم"-
أبو الكلام بساتين .. الإنبساط والنغم..
وأنا اللي عدى المحيط
وبحر شر حويط ، وداس عليه بالقدم
وأنا اللي باحلم ساعات-
أقتل ضباب السكوت..
باخلي شمس الصباح-
ترمي السلام ع البيوت
يسألني ليه القمر -
بادوب فى حبك واموت..
وانتى ياست البنات-
.. تاجي المرصع ياقوت
إنتى الغرام والهوى
والصحبة صابحة السنين
وانتى النسيم الدوا
والحلو شايلة الطحين
وأنا اللي منك باغيب
وارجع ساحبنى الحنين
محلا الكلام يامصر...
محلا العطا يانيل...



٣- كلام مصرى

بحبك .. بحبك .. بحبك .. بحبك ..
أحبك كده ...
شراع أبيضانى
وعود أسمرانى
وحبة عرق
بحبك سواقى ...
بتسقى الشراقى
يموت الفلق
بحبك مصانع ..
مداين جناين-
بعقد وحلق
واحبك عروسة ..
فى إيد بنت عامل-
بيبنى البلد
بحبك حصان ..
ببرقص بفارس
وطالع سبق
بحبك مدارس
ودارس وشاعر
ورنة وتر
بحبك .. بحبك ...
أحبك قمر-
يغنى لبنتى غناوى السمر
بحبك يامصر تصون العلم



ده مجدك أمانة
بإحبيك يابلى-
تكونى بارودة فى صدر الخيانة
أحبك كده .. أحبك كده..


١٩٦٨

أغنية للسويس

* علمتينا لمابدينا ، نكتب فيكى حروف أسامينا ..
علمتينا إزاي نتعلم .. نخفى جراحنا مابتألم..
علمتينا " الشعب معلم"..
.. كيف الحب وكيف نتقدم...
باسم الحب ، زرعنا الخوف فى قلوب أعادينا
علمتينا .. علمتينا.. ورفعتينا رايات ياسويس

* علمتينا الذوق والطيبة
علمتينا مانبدى بعيبه
دوبتينا فى حب العيلة...
وان الدنيا - إن ضاقت - تبقى -
وحده وأقوى
كتاف شيلة وأد الشيلة
* علمتينا البحر ، نزلنا البحر وساعنا..
علمتينا الصبر ، شبكنا الخير وجمعنا..
علمتينا نواجه الخوف ونخض العتمة..
علمتينا وكلك معنى :

.. لما الكذب يسود العالم -
إنتى الصدق ورايتك مادنة..
* علمتينا شرف الكلمة ومين أصحابها ..
علمتينا ، وانتى عروسة كتير خطابها ..
وزرعتينا فى كل الدنيا ، نجوم فى كتابك..



علمتينا الصدق الصادق..
علمتينا نخط مبادئ..
فكرك رائد-
وانا في كتابك حرف مجاهد..
.. بارز ع ورد الحب لينتى ولأحفادها
* علمتينا ساعة المحنة نشق الغابة...
علمتينا - فى زمن الكذب-
.. نعرى الصدر ونبقى ديانة
علمتينا نطلع شمسك..
علمتينا الموت على صدرك-
.. لجل تعيش مصون ومهابة
علمتينا .. علمتينا..
علمتينا نقول ياسويس..

أكتوبر ١٩٧١

ملايكة القرن العشرين

١- الدرس

القرن العشرين..
.. القمر الصخر المنظر
عصر الليل الأحمر
والموت النازل ، ساكن في الأيام..
زمن الأوهام-
أحلام الطيش الهايشة
والكذبة الناشعة في ربيع الشبان..
زمن التوهان في دروب الجوع
والشبع الصعب
عصر يتامى الحرب
واللى صلبهم فوق خوازيق الرعب-
كرباج السجان..
عصر الأحزان الألوان!..
فيه شيلنا ذنوب أساطير الكذب
ورضعنا مضغنا الصبر ...
مات فينا الحلم الأخضر في "هيروشيما"
شبيننا- عضتتنا اللهفة على الأيام الباقية..
لمينا "سوافي" العمر الفاضل -
في الدنيا الساقية .. دنيا "أميركا"
والأمل المرعوش-
في الزمن المالى كاسه الفضة

من دم الإنسان
الزمن الشبعان بالعتمة..
محكوم ع الميت - فيه - يحمل نعشه
محكوم على صاحب الأرض ، يفوت أرضه -
إن حب يعيش
محكوم ع الناس بالطيش..
محكوم .. محكوم .. محكوم.....
لو حنّبي -
يبقى نسينا الدرس الماضي -
إن كان..
تتخر فينا أهات العمر الجاية -
في زمان:
فيه الجاني قاضي..
والزاني - سنكر آخر ضلفة في عيون الناس
إحساس الشرف الفاضل -
في مداس الكرم "اليانكي" .. ذلة إحسان
القرن العشرين:
الصدق المتعطر بهتان
الشهداء المسروقة الأكفان
الحملة الصليبية الشرسة ضد الإسلام..
الأيدي الممدودة الوقحة ، وسموها سلام..
القرن العشرين:
ماأرخص شرف الإنسان..
ماأرخص شرف الإنسان..
* * *



٢- المعنى

* عصر الملايكة التغالب..
زمن اللي غالب وراكب..
واحنا يدوبك فلوكة-
لسه بتتسج شراعها
فى بحر بالغ مراكب
زمن الضحية المدانة..
لونمنا فيه باستكانة
وعشنا عيشة القواقع-
ماتجوزشى لينا الصلاة..
.. ولو تكون فى الجوامع
ده اللي نشيده بلاده ..
.. لابد يفتح طريقه -
بالكلمة شايلة المدافع..
الكلمة شايلة المدافع..

١٩٧٠/١٢/٣١

أصل الحكاية

* يمكن أكون عصرى ومش عارف زمانى ..
يمكن تتوه الذاكرة ويغلط لسانى..
يمكن ويمكن .. ألف ممكن فى الحياة...
لكن أكيد المشكلة-
جوانا من غير الكلام ثابتة المعانى..
وان كنت أقول - مش طنطنة..
وان كنت اغنى غنوتى-
.. بميزان حروفي المؤمنة - مش معلمة..
الدنيا ماشية .. ماشية ماشية - إنما -
..ألوان انا..
أولوانى زاهية .. مصراوية .. مغرمة..
أزرق غميق..
إسود غطيس..
باهت نحيل..
ورقة ف خريف عز الصبا..
أحزان "إيزيس"..
أحمر ومسفوك الدما..
أصفر دريس..
مدهوس فى عصر الطلسمه..
مدهوس فى عصر الطلسمه..
* ألوان انا .. ألوان انا...
من ألف سبعة وكام سنة-



شبيت هنا...
غنيت كثير ، عشت الغنا..
وعشقت من قصر الأمير -
حمامة بيضا مسممة..
باضت على غصون الأمل -
فقتت صغار متيسمة ...
وهنا وهنا -
غناويا طلعت للسما..
على شط نيلي والغيطان -
غناويا نزلت ملحمة - أنوار ونار..
"رمسيس" سقيته الكاس هنا -
نقش بأيدي ع الحجر عيد انتصار ..
لونت حبي في الصور لون النهار :
أبيض حليب ..
أصفر ذهب..
أخضر خضيب..
والوان عجب ..
لوني الأصيل -
وردة وشجرة وسنبلة..
.....
*مشيت وجيت ..
وع الطريق ، ضميت حبيتي وبستها..
ورميت حمولي ف حجرها -
.. حبي الخزين
نقشت لي غنوة بقلبها -

فى صدىرى منقوش بالقصب
والكمة كانت بلبله..

.....

* ألوان انا .. ألوان أنا..

من ألف خمسة وكام سنة-

شبيت هنا ...

عصر السنين المحزنة..

من بعد ماشح الضمير

واتصفت شلل الأمير

والدنيا صبحت زلزلة..!

من ألف خمسة وكام سنة-

١٠ "كاموس" بدا - وبدت معاه-

بالسهم فى صدور العدا

بالحق حق وله صدى-

"أحمس" عطانى السيف وقال :

(ظهر الرجال لوينحنى، الدنيا تصبح مهزلة)

وانا مش هزيل ، بالنيل فى إيدى والهرم

والأرض خير ، جوايا بتدق القدم

أنا مش هزيل .. انا بس باكتب للتاريخ لون السنين ..

وبيد مين ... !


ومين حبيبي الملهمه ..!!

اكتوبر ١٩٧٦

١٠ كاموس هو شقيق أحمس الأكبر وهو الذى بدأ الحرب مع الهكوس ومات فى المعركة وأكمل أخيه أحمس معركة التحرير من بعده.

أحلام الكلام

يامعلم الطير. الغنا ...
بلدك هنا .. بلدك أنا -
شابل حكاوى الناس ، غناوى وندنة ..
علمنى كيف يبقى الكلام حكمة ..؟
كيف تضحك العتمة ..؟
وكيف ، يخضر قولى فى الخريف ..
وتجذف المجاديف ..!
يا بلدنا يام الكلام مجاديف ، وحيبتك ..
حفظت موالى الحزين - بيتك ...
ويا عيني لميتك ...
نزلت بحر الزمن ، طلع الزمن خوان
أمنت بالخير والحرام ..
وسألت عكاز الكلام - قلبى ..
.. نهنه على طرف اللسان - دمعى ..
حرام أنعى ... والله حرام ننعى ..
يامعديدين على بن خالى من الحمام :
لولا الملام -
كنت اسرق الغنوة من الكروان
واغنى ليكم غنوته
وحتضحكوا .. وتلعلعوا -
.. أوهام !
وياما ضاعت فى الهوا أوهام ..



ويا ما ... يا ما اتحققت أحلام ..
باحلم بحب و غيط - و بيلد -
ملهاش ببيان
باحلم بروح إنسان
باحلم بصدر حنان
باحلم بكل مكان
.. دفن الآهات وبيدفن الأحزان
لو كنت انا "سليمان"^١
أعرف ألاغى الطير واحكم ملوك الجان
كنت شجيتكم بالغنا - حكمة ونغم ..
لو كنت انا -
.. كنت ازرع الفدان غيطان !!
أحبس غيلان و غيلان و جان ...
وافتح ببيان بكره امل و امان ..
يامنقرشين فوق الببيان حكمة -
و بتسمعوها كلام - حلوا الببيان
و حتفرش الشمس الغنا ..
تضحك لكم و اضحك أنا ..
لا نغنى موالنا العجب ..
ولا نطفى دمعاتنا ف كاسات -
برميل عنب !!

(سبتمبر ١٩٦٥)

(*) سليمان الحكيم.

الربيع والنأى

إسمك ندى .. يام القوام الفل ..
زهرك ربيعى وابتدا-
وانتى الغرام والخل .
انتى وانا .. ع الأرض أو فى الفضا .. بنحب ما بنكل
محلا ساعات الرضا ، لما علينا تهل ...

.....
* يا صافية صافية الأمل -

ليه النأياتى حزين

من فى صفاكى الزين ؟!
- من بسمه النوار والغلة فى الطواحين
* يا صافية صافية الأمل -
بتجيبى فرح منين ؟!
- م الساقية لما تدور والخضرة والياسمين ..
* يا صافية صافية الأمل -
من زنفه الأرزاق وفرقة الخلين ..
من ناس بتتلف عرق ، تعطى ولا بتمل ..
وناس بتلعب ورق ويتعبوا م الضل ..
من غيبة الوردة ساعة الربيع ما يحل ...

مايو ١٩٧٧



حدوتة مصرية

غنيتها .. وف كل مكان
غنيتها ...
ورسمت صورتها الشابة في قلبي
على الجدران
حبيتها .. بالتوب والطرحة وبالفستان
بالشعر ضفاير او مقصوص ..
حبيتها فانوس -
بينور ليلي ويزرع بدل الغول إنسان
حبيتها علوم ودروس
حبيتها حنان وسلام وإيمان ...
حبيتها كثير وعرفت -
الحرف ان قال الصدق
والحرف الزيف في كلام مرصوص ..
علشاتها زحفت، في الصهد وعز البرد
لفيت وتعبت ..
على بابها ارتحت ..
تحت الشباك في العتمة ليالى وقفت ..
غنيت غنوتها الصابرة
غنيت غنيت وارتحت..
- ع الدرب مشيت
وسط العفاريث والجن مشيت



لا عمرى بكيت ولا حتى صرخت ..
قدام الموت برصاص الغدر ما خفت ..
معرفة شئ غير انى باحب...
يا حبيبتي ...
حبيبك زوجة وأب وأم وأخ وأخت
حبيبك عمر
علشانك بس كتبت الشعر ..
علشانك بس كتبت -
بالكمة الخضرا السيف ونطقت ..
رصيت الحرف جوار الحرف
لا رعينى الليل ولا رعى الطرف
يا حبيبتي . حبيبك ايوه صحيح
وناجيتك . يا ما ناجيت ...
فمرايتك جوه مرايتى
احلامى جوه مرايتك
ضميتك شوق يا عروستى
جوايا وأنا جواكى ، وبنملك كل البيت
مرغت ليدكى فى صدرى -
ع القلب مكان النبض
مرغت ايديا فى صدرك -
بالقلب شديد ولا خفت
م السادة ومن الحراس !..
فى سريرك قلت ..
فى نهودك ياما رصعت
وف عرقك دبت ، ولسه بادوب ..

وكبرت كبرت ، ولكن -
طول مانا مش قادر أزرع
فى عيونك فرحة وضحك - باصغر ..
باصغر وباحس .. أن انا قدامك طفل
يا اجمل شئ غنيتة ويا اجمل اسم لعمرى ..
غنيتك ياما كثير ...
وكتير راح اغنى ، باغنى
غنيت "الميم" فى مكان ما تخلق الحب ..
غنيت "الصادر" إصرارا ورميت الصبر ..
غنيت "الراء" بالصوت الحى ، قتلت الرعب ..
غنيت غنيت ما تعبت ..
غنيت غنيت ما كذبت ..
ما كذبت يا مصر .. ما كذبت يا مصر ..
يا غنوة شوق فى لسانى
مروية بدم ولادك .. تحكى وبتدين العصر !..

١٩٦٩

ألوان عصرية

* باعرف تفاسير الأحلام
باعرف لون الأيام -

من إيه ...!
وينشرب ليه .. كاسك يا زمان؟
باعرف مع إني منيش "لقمان"
أبو رأى سديد
مع إني لسه فى إيدى القيد -
باعرف اعاجيب وبيوت سراديب
بتلم الفاضى مع المليان ..

.....

* باعرف فى الفرح وفى الأحزان -
وبنعشق ليه...
اللون الغامق م الألوان؟!
.....

* باعرف إنسان..
لو نام وف عقله الباطن وهم -
مسكين .. مقولب معدول .. مصلوب.
يتفزع فى الرقعة
وبتحاصره خطوات الدادابان

.....

* باعرف تعاتير السكة فى أى مكان...
الناس الزيف..



والزيف الناس ..
الندهة ف عب الليل..
الخوف الموت .. صوت السجان

.....


* باعرف في مزاد الخير
والناس امات طراطير -
بيبيعوا البسمة بكام..!!
أحزان .. أحزان .. أحزان..
او بعض أيام..
لحظات بتشيلنا لفوق ..
وسنين تحت الأقدام

يناير ١٨/١/١٩٧٨

المزاد

* لو تشتري السلام -
أبيعك السلام ..
"حكاية الزمن"
* لو تشتري التحية -
أرميك التحية ..
"لكل شئ تمن"
حكاية كل يوم
وكل يوم مزاد
عشش كانت بلاد
وبلاد كانت عشش
"سبحانه له حكم"
.....
صلينا في الربيع لوردة في الخريف -
.. لم انتها لنا بيع :
عطن
عطن
عطن
بشف ضحكتي ، من بسمه الرضيع..!

يناير ١٩٦٧



٤٢

الإنتماء

* بانتمى لعالم بعيد ..
بانتمى لعالم جديد..
عالم ياخذنى بألف إيد-
ينشلى فوق ، أرجع وليد ..
بانتمى للصدق يرعش قلبكم-
حيث يبقى كرباج الضمير قضبان حديد..
..
* بانتمى للبحر .. للصيد .. للصراع..
للحب .. للموت الشجاع...
لعيون بلدنا الطيبة..
للدنيا تغزل للصبايا ميت شعاع ..
..
* بانتمى للشمس .. للنور .. للحيا ..
للبسة فوق خد القمر ..
للنجمة تبعد ألف ألف وألف ميل
ومونسة الأرض الحزينة بالضيا ..
..
* بانتمى للخضرة على خد الغيطان...
للزهرة من فوق العيدان
للسنبلة ، والقمح على عوده استوى ..
لرجال بتعرق بالعمل .. مش بالكلام !..
..



* بانتمى ليكره الوليد...
للتمر فوق شوك الجريد..
للغنا من غير عنا ...
للشعر لما أسمعته -
والقى حروفه مش عبيد ..
.. ..
* بانتمى للغد واضح ، مش مريب ..
للناس بنفتح قلبها ، حنة وطيب..
بانتمى
بانتمى
بانتمى
إنكلمى .. يا كلمة الحق الغريب !..

إبريل ١٩٦٧

غنوة قديمة

- (يا ليل .. يا عين) ...
غنوة حزين نوح
ودهساه السنين .. يا عين ..
والنيل معدية
ومركب خير .. وبنية -
للحمام إن غاب ..
يعرف وليفه في جنة الأحباب..
وف قصة الأصحاب
ياما يا عين ، خدنا -
نبحر بين حكاياته ..
نزلنا الدنيا وسبقنا
وعشنا الحب في شطوطه ..
وشرقنا .. وغربنا ..
وتاه في الصخب صوته ..
_ (يا ليل .. يا عين) يا موالى ..
كلام الحب رسمالى ..
وحالى بينعى على حالى ..
(لا متقدر ولا مكتوب) ...!
(يا ليل .. يا عين) وأنا المغلوب..
قالولى الحكمة بالمقلوب
داريت الكلمة من خوفى
وصبييت الدموع مشروب..

لا كان خاطري ولا بكيفي
أهين يا سكة المحبوب ..
شعاعك فين ينورني ...!
باقولك والكلام محسوب ...
لا طب يصحصح المبلى ...!
ولا رعرع بلاد أيوب ...!!

إمبارح ... لأ ...

* لأ ... مماتتش الأرض ..
مغابتش الشمس
واحلام المجد ...؟
.. مش حا حلم غير بالمجد ..
بيلدنا امات عنا قيد فى السد
بالفجر ...
الفجر اللى اتعلق فى ضفاير أمى ومال -
باس خد النيل .. عمر قناديل عمال ..
حط النوار على صدر بلدنا "اشمون"
مش حارضى بغير الفجر، أخطى واعود
وأجيكى يا أمى بغصن زيتون ...
أشرب من عرقك ..
أحبك أرحمك بالأحلام ..
بسلام بلسم
ورجال صوان ..
بركان بيطلع شمس النصر ف أى زمان ..
- مين قال الصبر بيفرش غيمة على الغلمان ..؟!
- مين قال الظلم بيطفى النار ..؟!
(حمدان) .. يا ابن امى وابويا -
(ألف رحمة عليك) ..
حسك تدفس راسك فى الوحل ..
حسك تتالم أو تخجل - إتطمّن -


الأرض بتترجرج غليان ...
الأرض امك بتضمك
وبتغسل شرفك م الأحزان
وبلدنا أم الطنبور بيدور
سهرانة تقول، والقول قوال -
حكايتنا الصعبة مع الموال
عن طفل رضيع -
غاب ليه .. وازاى بيضيع ..
عن ناس - تشتري فى الناس وتبيع ..!
عن كلمة اتخنقت عز القهر اللي رمانا ..
عن ناس - عرفتشى طريقها الجبانة ..
عن قلب اتوقف عن العزف -
والخوف بيهب
يا بلدنا يا بنت الآه والحب -
كستينى بتوب الصبر عرفت الدرب ..
زقزق كروان القلب ومد ..
وكتير شقيت الغابة معاكى ولا اتعثرت ..
العود ان جف الروح بتشب
والأرض بتحلب عزم أشد ..
يا بلدنا يا بنت الآه والصبر ..
طريقك فجر -
بيغذى أتون الآه للرد ..
يا بلدنا الغد الغنا والبدر -
طريقك فجر
وانا شايف الفجر أكيد مش حلم ..

أنا حلمى نشيد -
كلماته بتعزف نبض الشعب بلحن جديد
وامبارح لأ...
مما تنش الأرض ..
مغابتش الشمس ..
ولا عمر الشمس فى يوم حتغيب ...

٩ يونية ١٩٦٧

جواب من السويس

* باكتلك..
وباعتلك يا حبيبي سلامي ..
باحكيلك..
عن ليل خلاني وأحزان
عن سمانى
وحصانى الدائر فى الحلبة وسابق
أيوه حصانى -
سرقوه يا حبيبتى ، النخاسة
صبغوه..
وباعوه للزانية وللزانى
مقدرتش أزعم .. مقدرتش ..
مش قادر أزعم .. مش قادر ..
ده الليل فاجر -
لو هب يطب على لسانى ..
فيه إيه تانى ؟..
مخلصنيش ترعى الشياطين جوه بيبانك
مخلصكيش اهرب وادفا بأحضانك
مفانتش النار غير لقمة ف حنك الصهد
مفانتش النار غير قهر
غير ليل غواص .. بيغوص غواص ..
بيعضعض فى قلوب معضوضة ..
والناس -



بيحبوا السما تضحك والبحر يعوم ..
بيحبوا الأحلام تتحقق
ويحبوا صلاة النبي احسن ..
والنعمة تدوم
ويحبوا الأرض يغنولها ، والبحارة
وتروس المكن الدوارة .. ورغيف العيش
ويحبوا الفجر ينسيهم كوابيس النوم
.....
مساكين الناس .. يا حبيبتى المسكينة ..
مسكينة الأحلام فى الطينة ...
مساكين الناس اللي خنقهم -
صرخة عيل تحت (مارينة)^(١)
- سامحيني يام ابني اللي فى بطن الغيب ..
سامحيني وصل على ألامى ...
شفى جوابي بقلبك .. شفيه ...
نطوري قلبك على كل طريق .. إبكى وغنبيه
حنى كفوفك جنة سويسى
إبكى "سويسى"
نزلى دمعاتك حنيهم غنوة حزينه ..
لو ضحك النوار فى طريقك .. سامحيه -
مسكين سارقاه السكينة
لفى واقلعى راسك، وامشى حافية ..

^(١) مارينة : هى عمود الخشب المستخدم فى سقوف المباني حيث كانت معظم مباني السويس مسقوفة بالخشب.

حافية .. حافية ...
مش حزل لو شفت كعوبك حناها الطين
مش حغضب أبدا مش حغضب ..
ده انا متحنى بدم أخواتى وباليين ..
وكلام ضايعين -
عن زفة وماشيين فى الزفة ..!
وميزان ييطب ملوش كفة ..
بيبيع واشترى ...
تشتري ونبيع بلا بيع ..
زى اللى ف مستشفى بلدنا ...
كل الحواديت المخزونة .. أه مجنونة
ومنادى وميتين سميع !!!
- مين حيفرجنى جنينة الأحلام الصافية ..!
مين حينسينى ينسينى -
ويشد بلدنا من الكافية ..?
حبة عافية .. ولا أصدق -
غير قلب الأيام الملوى ...
وصريخ الصمت
الديب الليل اللى بيعوى .. يدوى -
يطوى النغمات المبجوعة .. حلم الخوخة ..
كام خوخة حضنت احلامنا .. غيرها الخوخة ..
كام أهة بتلوى الضحكة تدريها -
تسفى غناها ...
كام شمعة الضلمة بتتهيجا ..
ده ف معزانا -

مكائنش النصبة على هوانا
بكينا النيل والسمانة على كتف الأرض
بكانا الصوم عن طلب الحق .. !!

٢٤ أكتوبر ١٩٦٧

غنوة سويسى

* وخلصنى اللى كان دمة
وشيعنى ما بين كنا ..
وكنا وكانوا .. ليه كنا ..؟!
داريت كلمة ...
.. فضحنى الحب ع المركب
هنا جينا وعدينا -
بيحضنا دفا الأحلام
وحتى شمس مرعوشة من السجان
وغنوة حب بكريه ، بدفيه وتوب أبيض ..
وحبة حنة من "أسوان"
بقت حكايتنا حدوتة
حكيناها بكام لهجة ..
وكام من مرة سألونا عن القصة :
عن المرجان
وبط البحر والسمان
وع اللولى
ما حد سألنا ع اليايسة
عن البندر
وكيف بتعتم الحارى من الفجرية للمغرب
وكيف بيضلم الشارع من المغرب ..
لحد الفجر ما ينادى على العمال ...
ما حد سألنا ع الغنيوة .. لو تطلع .. !

عن الشموسة تتفرع
وتتسج فيما مليون شمس...
* * *

* آهين ... يا بلد عمرى ..
يا باب البحر والمصنع ..
ولميتى الشبك بدرى
أيا بلدى ...
غريب جيتك .. ولفيتك ..
غرفت الحب من بيتك ..
نسجت بقلبي موالك .. وغنيته ..
مع الشغيلة فى المصنع ..
مع "البمبوطى" فى المينا .. وع المركب ..
مع فلاحك الضاحك على كتفك ..
وسار يتحاكى بامجادك
ويا ما كبرت بمقامك ..
وفى مقامك، رميت حملى وشيلتيني ..
وشيلتينا-
عيال فى الروضة نتهجى أسامينا
كبرنا .. علينا ويقينا ...
وغنينا .. غناويكى الملالية .. بحرية ..
وقلب بيعشق الكلمة .. حياة حية ..
مع شبانك الطلبة
مع الترحيلة والفلة ..
وكل الناس

وقلنا كثير على شطك .. كلام بمقاس ..
عن الدنيا ..!
وليه جارى .. وراح يجرى ..!
وعن أسطورة الوسواس -
لو اتحكم .. وطاح فينا ..!
ويا ما عشنا نتغنى .. بنتمنى ..
وقبل ما تكمل الغنوة، شرد بالننا -
مع أصحابنا ...
مع اصحابنا اللي بدروا الحب ولا خضر ..
مع شهدا محاربوشى -
.. رمال سينا تقول أكثر
مع كل اللي قالوا الحق ما تسمعوا ..
مع قلبى بينزف فى الحشا دمعته..
آيا بلدى....
يا غنوة حب فى لسانى
فى أحضانك عصير قلبى ...
وانتى الشمس أحضانى
آيا بلدى ...
يا نبض القلب وحصانى
لعوم بيكى فى بحر الموت ،
واعديكى .. أعديكى ..
وارجع بسمتك تانى

١٩٦٧/١١/١٥

أيوب السويسى

* ما ترجمونيش بغنوة قهر كدابة ..
ما تزرعوليش فى بحر الملح لبلابة ..
ده انا صاحب ..
.. صاحبت الزرعة بدرية وبنية
وغنوة أرض بريابة

* ما تندبوليش على القمراية والنجمة -
وهيه هناك بتتدلى
وكام مادنه بادان وهلال ...
قولولى ازاى يكون عيدنا -
عشان افرح
وتضحك امى فى الغربية
وابنى فوق نهود امه ...

* ما ترجمونيش بغنوة صبر ع المكتوب ..
لا نا "عيسى" حدير خدى ..
ولا عمرى حكون "أيوب"!

١٩٩٩/٧/٥

الطريق والصحبة

- غنيت فى كل مكان ..
.. مش بالفرح ببيكم
غنيت عشان أحيا تكونولى ، واكون ليكم
مكونشى غريب على الأيام
ولا تبقىوا مع الأيام ..
.. وانا الشيال

- غنيت ببيكم ياما
والغنوة تعبت بى
ضميت عشم قلبى ..
ومشيت محاببيكم
رخيت لكم قلعى ..
مش قصدى اجاريكم
إحساسى خبيته ..
والصبر غنيته ..
شربته .. صبيته ..
ورجعت سفيته -

ظاهر* ومتخفى
جيتونى فى افراحكم -
حنيت لكم كفى ..
ولعبت لعبتكم ..
رقصت رقصتكم ..
شربت ما يكفى ..

واخرتها فوتونی ..
وحدانی فوتونی -
دهسانی ضحکتکم
ونعشی ، فوق کتفی !..

۳۰ مارس ۱۹۶۸

كلام لسيد درویش

وسمعتك نغمة وانا باحبي ..
وصغير كنت ...
أنا كنت صغير ولكني
منساس الأحلام الخضرا ..
والقول لخضر
.. نغماية تطبطب على قلبي
يا نعم مصرى .. خدته وخذنى ..
ولفين خدنى
بحرك ولقيته على السكة:
الناس اللي بتعشق ضحكة
الناس المحروقة قلوبها وكامشة فى توبها
والناس السريحة عرقهم - ملاليم فكة
وياك غنينا وغنينا ..
ونبشنا "الكوم" عن حدوده ..
توته وخلصت
مع إن بقيتها على النوتة ..
بنقولها يا "سيد" لولادنا ...
وكلامنا بيدن ع المادنة
وتدندن بكلامنا المادنة
"الله أكبر .. الله أكبر"

(١) الكوم: نسبة إلى كوم الدكة بالأسكندرية

محلا العرق في العمل ..

محلا الإيدين الشغالين سابقة المكن ..

يحلالى ساعة يا "عرب" والعب معك عشرة
و(٢) "الطيبة" عشرة

معانيها أنا .. وأنا من معانيها

والحشاشين الحلفانين -

يفوتوا الكيف على زعقة ... تقول بلدى ..

بروح بلدى وغنينا ...

وقلنا "الدنجا" سودانى ...

ناحييتك يا با وهويتك -

وكان الحب ربانى ...

بقلبي باغنى اناشيدك فى يوم عيدك

"يا مصرى" .. وقايم المصرى

نشيد عصرى

يا "سيد" واحنا من توبك باقولها لك :

نشيد البر يحلالى فى يوم نصرى ..

دى بصمة ليل على قلوبنا ..

فى ديل توبنا ...

وديل توبنا ، نلمه بعيد ...!؟

لكن ولإمتى حنلمه ..

فحيح الليل على شطوطنا نشر سمه ..

(٢) إشارة إلى حى كوم الدكة بالأسكندرية.

(٣) الطيبة : نسبة إلى اوبريت العشرة الطيبة

ونامت مركبى الصيادة تتلوى
تدور ع الدوا الأقوى
وناسى الصيادين كلوا ولا ملوا
بيستتوا القمر يطلع
يلف البحر وياهم .. يقول مغنى
ويومها يا سيد المغنى ، فى يوم ذاكرك
حتلقانا
بنسلطن مع الغنوة .. تقولها وراك ..
واغنيها على كفى ..
أغنيها على كفى ..

١٥ سبتمبر ١٩٦٨

ضحكتى وش البلد

- وابتدى ..
- .. امسح دموع الحزن جوايا
- انزع جذور الرعشة فى حشايا ...
- أطلع جبال الصعب - كلمتى معايا ..
- أنتشى .. أفرح ... أعيش ..
- أنسج غنايا فى الربيع -
- وأكسى قلوب الناس محبة فى الخريف
- أبتدى أضحك صحيح ...
- .. أما اشوف الغنوة طالة ع الشفايف -
- طابعة ضحكة
- واما اشوف الناس بتسعى -
- وف عيونهم كلمة صابحة
- واما اشوف الخضرة زاحفة ع الصحارى
- واما يبقى طوف بلدنا ف بحر هايج -
- .. والعباد مجداف وصارى
- أبتدى أضحك صحيح ...
- أما اشوف المادنة بتصعد أدانها والمدينة -
- .. سائرة توبها
- واما اشوف شمس الحقيقة من عزلة فى وهم بكرة
- واما اشوف بنتى الوحيدة - مش بتسأل -
- عن دموع امى الغريبة عن ترابها ...
- أبتدى أضحك حقيق -



أما اشوف الناس بتعزف ع الطريق ..
.. غنوة نضال
طابعة ع الأرصف غناها - والرجال -
مصر فيهم ثورة فايزة
حاطة شايلة
شايلة حاطة -
شمسها على كل غيمة
طابعة فينا وشوش حزينه ..
أبتدى أضحك بحق -
اما اشوف الراية مصرى زائنة سيننا
واما نبقى كلنا فى الحرب صحبة ...
نتقتل .. نتقتل .. نموت !..
الحياة فسحة نهار - ينقضى -
والباقي شعب ...
الباقي شعب ...

اكتوبر ١٩٦٩

بيان مصرى ١٩٦٩

- إضرب .. إضرب .. إضرب ..
إملا الدنيا بارود ونيران
إضرب .. إضرب .. إضرب ..
صحى تراب سينا الغليان ..
إضرب .. إضرب ...
ياللى جهادك نور وأدان ..
إضرب .. إضرب ...
لجل ولادنا تعيش فى أمان ..
يللى زنادك عزم بلادك
مصر بتطلع فوق بعنادك -
فارضة الحق على الطغيان ..
إضرب .. إضرب ...
خلي صوتك أعلى وعيش ..
إضرب .. إضرب ...
إنت المدفع وانت الجيش ...
إنت الكلمة وزرعة بكرة ..
وانت الضلة والإنسان
إضرب .. تسلم إيدك قول ...
خلي نشيدك يملا الكون
واغسل قلبى من الأحزان ..
إضرب .. إضرب ...
طاقة الغل نيران ما بتتعب ..

إضرب .. إضرب ...
مصر وراك في الزمن الأصعب
ثورة رجالها حديد وطوفان
إضرب .. إضرب ...
وافرد شبكك ولا تترتاح ...
يابو لعزم أتون ما يبهدا -
خلي البحر فسيح وبراح ..
ده انت شراع المركب ، وانت
في عصر القوة .. أقوى وأكبر م البركان ..
إضرب ... إضرب ... إضرب ...

ديسمبر ١٩٦٩

الشاعر والقضية

أعرف أبيع الشعر للشعرا .. أعيد واقر ..
.. ومهما يكون
بأعرف أخلى الصخر يتألم .. بباطى للفقرا
.. نهز الكون
ولو عطشان وطعم الملح فى لسانى
.. بأعمل فى حارة السقاين سقا
.. وأعيش ميت لون
بعرف وأنا كلمة
حروفا شائلة جوايا آخر شمعة ، ف طريق مجهول ..
بأعرف حاجات ياما ، ومش خايف من السكة ..
ولو مارء هنا يجينى ، بأحطه تانى فى الصدفة ..
.. وأغش واجون !
ممكـن يا سادة أكون ، وكل شئ جايز ...
ده ف عصرنا الكداب ، لأى شئ ناولون
ومسابقة بجوايز
ممكـن أكون بكاش
أقراكم الفنجن ، وأحكيلكم عن الماضى
وع اللى جاى ، ولسه ما جاش ...
وتصدقوا الكدبة
طول ما الطريق خالى بعقول كتير فاضية
ولو "خالى" أبيع له البحر ولا يدرأش ...!
دنيا ... فيها البكش سلطان

عابش كما "طرزان" فى غابتكم ، وله تمثال ..
وكل شئ جايئ
ولأى شئ ناولون ومسابقة بجوايز ..!

..

* ممكن أنا اسحركم ، واعمل هنا حاوى
واعمل كمان أراجوز ...
وتجوز عليكم لعبتي - ويجوز -
ألقي ما بينكم شلة بتعارض -لكن - بصوت محجوز !
* ممكن أكون مياس
ألعب على الحبلين وأبرجل الحراس ، وأدوخ القاضى ..
لكنى يا سادة .. لا زلت بأكادة ، على عهدى انا الماضى
باغنى للإنسان
ولناس تقدر ناس وليها قلوب ..
ولكل شئ أخضر ، وسط الهدد والموت ..
باغنى للإنسان ، على الكنال صاحى ..
باغنى يا كلمة
وانا نفسى ترتاحى من الأحزان ..
باغنى للصحة ، ولكل شئ بميزان ..
باغنى للبسمة ، ناقشة الوشوش أنغام ..
ولشخبة أطفالنا ع الجدران
فى "الأربعين" .. فى "الغريب" ...
الشارع المليان .. اللى صبح فاضى .. !

مارس ١٩٧٠

من مفكرة راجل سويسى

* الكلمة لبلادى
والصبر جلادى
الكلمة لبلادى فى بحر الصمت غنيته
شالت حملى وغنت لى ..
.. بكيف كفى وكيف كيفها
وقالوا زمان :
"ده ياما الصبر بيهون أمور ياما"
شربت الصبر من نبعه
لقيت الصبر جلادى فى عصرى أنا ..
عرفت الصبر زلزلة
ووخدانا لضلام جوفها
وانا دمعى كره صبرى
مصعب حمول الصبر بعدا الصبر يابلدى ..
مصعب يكون الصمت طبع الحب فى الدنيا
مصعب كلام الخلق جوه الحلق عن "يونيه" !!..
* * *
* م المينا للكنال لآخر "لاربعين"
بيوت صفوف وطوف ...
.. يقط ع الدكاكين
لوتتطق الحروف .. طعم الكلام حزين .. !
* * *
* ألف كل شارع حاضنه عنيا البيوت ..

والف كل حارة واتصنت ع السكوت ..
أسمع دقة قلبي ، في الصمت والبارود ..
وصوت لطيف صبية بيعلا ألف صوت :
"الدم ع الحيطان والحزن في القلوب"
لكن مع كل دانة فيها إصرار جنود
باشعر إن ابتدينا ، نكتب سطر نشيد
يتردد في الضماير وتغنيه الشعوب ..

* * *

* حمامي يا حمامي .. يامهاجر في البلاد ..
طمني يا حمامي عن بسملة الولاد ..
ازاي رضعو النسائم في زحمة المداين
وكيف حال البنات .. ؟
.. لسه شعورهم ضفاير واللافات الميعاد ..!؟

* * *

* آخر كلمة بيقولها شهيد ، بتعيش
تبقى علامة ونجمة ..

آخر كلمة .. حكمة
دى اللحظة اللي بتتطق فيها الكلمة الصعبة ..
آخر كلمة .. إياك والنوم ...
حسك تزهد في غناوى القوم ...
حسك وانت القادر - تزرع للناس "الدوم" ..
حسك تبدر حبة بلا محبة ...
أرضك .. النيل .. الناس
عينك ع الشجرة البكر ..
حسك تنسى ، تنسج غنوة فرايحى -

.. تطبع بسمات على شفة مصر

* * *

* يا كلمة الحقيقة ..

يا سكة فى كل ضيقة ..

ليه لما تبقى خضرة

.. يسقوكى الود سخرة

وانتى الحرة المضينة !!..

دورى ياكلمة دورى ..

وخضرى بذورى ...

.. لسه الأيام بريئة

.. لسه الأيام بريئة

يونيه ١٩٧٠

ثلاث حواديت من الجبهة

١- أمثال :

* قالوا :

إن كان بتجيكوا الريح من باب .. ردوه ..
وان كان فى طريقكوا كلاب .. التوب لموه ..
واصبر ع الجار السو
وان كان .. وان كان .. وان كان ...
ملعونة كل الأمثال ...
ملعونة الكلمة ان طاطت للأحزان ..
أو مسحت عتبات السلطان

.....

* نسمع

من جوه نجوع الريف - إحساس الإحساس ..
حيث أى رغيف مع أيها حد - يتقاسم فيه الناس ..
نسمع من راجل سنة فوق السبعين ..
بيقول على مسمع م القاعدين :
"يا أمينة يا بنت حسين مسعود
مع إني ابوكى حسين ، وباعزك
لكن أبدا ما حسامح
ولا تبقى بنية ابوكى صحيح
ان شب وليدك (أحمد زيد عثمان) يعرفشى الحق ...
أو مين خلاه من صغره يتيم الأب ..

لو شب الواد ولا خدشى بتار الأرض
لا حتبقى بنية ابوكى صحيح ..
ولا يبقى الواد من صلب أبوه"
..

٢- السويس فى ٢٤ أكتوبر ١٩٦٧

* وش السما أحمر ..
.. قلب السما دخان
.. وش السما غايم ..
.. قلب البلد أحزان
لكنه مش دايم ..
ولا كانشى يوم نايم
الصبر فى البركان ...
..

٣- اشتباك :

* ميل وقال يا عم:
" الموت علينا حق
يخلفشى مواعيده"
ميل وقال يا خى :
"اكتب هنا بالدم
عليه الجرف من "صدفا"^(١)
إسمى وعنوانى
يمكن أكون نقطة ويمكن حرف

(١) صدفا : اسم أحد المراكز بمصر.

أعيش تانى
على لسان الشعب فى نشيده"
ميل ولا مالشى السلاح ف ايده ..
النبض صاحى وحى .. ومش صدفة
لكنها السكة ...
يا مضيعين الضوم السكة ...
شوفتوا القمر ، واللاهنا لسه
بتبعثروا الأيام وتمنظروا الفكرة .. !
كان السؤال ميت على الشفة ..
لكن عينيه المفتوحين
بتقول لنا الخطه ..
(إفتح نيران الحرب
وصحح الخارطة ...
إفتح نيران الحرب
وصحح الخارطة ..)

فبراير ١٩٧١

قصر الكلام

شيلوا الحمام ..
حطوا الحمام ..
إحكوا الكلام ..
ما تسببوش الشعر بعقد لولى وكهرمان ..
ولا تلعبوش ويايا بالخطب اللئام !..
لا البحر حيرد اللي راح ..
ولا البكا ينجد شرفنا المستباح -
المبتلى أحلام ..

قصر الكلام
أنا من بلدكو وبحركم .. لكن
ليا نبى .. صليت عليه بالحق ..
إسم النبى ، على شفة الحدوته صدق ..
ما تسببوش الشعر ..
ولا تغلطوش فى العد ..
"تبت يدا" .. قابل كتاب الرب ..
يا موحدين بالرب :
إرموا السلام سلامات
خلوا السلام بدايات
بالحرب يصبح فرض

مارس ١٩٧١

العهد

يا طير ياللى طائر ودمعك أهات ..
كرهنا الدموع .. كرهنا السكات ..
بيسعد قوبنا هدير البارود .. هلمونا
جنودنا زنونا يصونوا العهود زلونا
عهدنا الحقيقة
تشيلنا نشيلها مطالع مطالع ..
طبعنا الحقيقة فى حلق المدافع ..
عشان نبقى نجمة لكل الرايات ..
طريقنا اللي فات .. عرفنا اللي فيه ..
واللى مقالشى كلامنا عليه
تخطه المدافع ... تقوله الدانات ..

يناير ١٩٦٨

الفجر ع الطريق

الغنوة طالعة طالعة .. والفجر ع الطريق
الشعب عرف مكانه ، ومين يبقى الصديق
إن كانت الحرب صعبة واللا كانت جراح
حنخوضها واحنا صحبة ونطلع الصباح
حنخوضها يارفاقة والحق اكبر ضمان ..
حنخوضها م المصانع .. م الشارع والغيطان
وان كانت السكة صعبة .. إحنا اد المؤامرة
حنخوضها يا اميركا بالدم وبالسلاح ..
المجد فى الأعلى ..
المجد للكفاح ..

سبتمبر ١٩٦٩

ريس البحرية

- ياريس البحرية يامصرى ..
يابو العرق مصرى ..
يابو الكفاح عربى ..
هات الدراع ..
هات الدراع هات
ده بحرنا ...
واين البلد صياد
قول للقمر ...
قول للقمر لوفات ...
ايد للينا ...
وايدع الزناد تصطاد
حنعدى ونحارب ...
حنعدى ونحارب -
نفرش رمال الصحرا بالحنة ..
ونحنى قلب ام الشهيد غنوة ..
الغنوة دى كفاحى ..
الغنوة دى سلاحى ..
ومدفعى الصاحى على القتال سهران
...
- يا سهرانين لجل ما تعيد كل العباد ..
يا حلفانين بالدم ما تناموا
دوسوا الزناد

أدى الكلام مصرى ..
كل الكفاح عربى ..
بحر القنال بحرى ، واحنا الشراع ..

١٩٦٨

تسلم لنا

مدوا الأيادي مدوا .. مدوا الأيادي ..
دوسوا الليالي وعدوا .. دوسوا الليالي ..
ده النصر غالى غالى والمجد عالى
تسلم إيديك ياللى إيديك فوق السلاح ..
تسلم يا صانع م العدم والليل صباح ..
تسلم يا زارع غنوتك بالحق نواره ..
تسلم يا قاتل كلمتك ، عالية وقدارة ..
تسلم لنا .. تسلم لنا .. تسلم بلادى ..
تسلم قلوب الناس والهمة موالها ...
تسلم يا عربى الأرض وانت اللى شيالها ..
تسلم يا راوى الحبة لجل عود اخضر
تسلم يا زند الحق والعمل أكبر ...
تسلم لنا .. تسلم لنا والمجد للإنسان
مدوا الأيادي مدوا ... مدوا الأيادي ..
دوسوا الليالي وعدوا .. دوسوا الليالي ..
ده النصر غالى غالى والمجد عالى ...
النصر غالى غالى والمجد عالى ...

١٩٦٩/٢/٩

سؤال

- ما تسألنيش -
جواب مربوط على لساني
ما تحرمنيش آخر ضحكة ..
لانا فتك ولا خنتك -
ولا لونت أحراني
ده انا منك .. وزيك برضه باتالم ..
وباحلم بالقمر كلمة .. تصحي الناس ونتعلم -
كيف الكلمة تكون بوابير ..
بتهرس كل يوم عتمة
نغنى الحب فى الضحكة - بمليون صوت
بمليون قلب - كانوا زمانى - رغيى محروق -
رموها السادة ع السكة ...
- ما تسألنيش حنعرف إيه .. ونعرف ليه .. ؟ !
سألنى قبلك الراهب ، أبو العمادين ..
سألنى قبلك الواقفين عرق فى الطين ..
سألنى حزين ، وناس متغفرة الأحلام ..
مسحت بكى دمعاتهم وناديتك - ما ردتشى ..
سمعنى الليل .. شطب اسمى ..!
بتسألنى ... ما تسألنيش -
يافرع زيتون فى أحلامنا
وباكى فوق شطوط النيل !!..

١٩٦٨/٥/٣١

صناع السد

الموآل: بالضم كلامى عقد حب .. للشغالين ..
بازرع كلامى الحر ورد للسهرانيين -
اللى بادرين الأمل ع النيل ..
.. سنابل حب للجايين
سلام ليكم يارجاله .. سلام القلب
ياصانعين م الجيل نهضة ، يا شغالة ..
ياعزم السد ياطالعين
الكورال: مهما كان .. مهما كان أو يكون ..
مصر طالعة .. طالعة طالعة يازمان
فكر واحد .. قلب واحد .. مهما كان -
.. سدنا فاتح لبكرة البيبان
فردى غنيا .. غنيا غنيا ..
وكورال غنيا وبالدم كتبنا -
(ترديدات) .. حدوته حتقولها ولادنا -
لولاد هم عن سد بلدنا -
عن عالم ، ردد أمجادنا
سهراية ويقولوا ياحليلة ...
الكورال : هिला هिला هिला .. هिला هिला هिला هिला
فردى وترديدات كورال :
يامصانع دواره دواره ..
دى عزيمة سدنا جبابرة ..
دورى دورى مل يهملك غارة

طول ما حنا بزفودنا معاكى -
العجلة راح تفضل دايرة
وياصيبة - فى الروحة والجاية
ما تخافى فى ريفنا الزراعية ..
حوارينا والمندرة قايدة ..
والفرحة سهراية وجنية
وهيلا وهيلا
هيلا هيلا هيلا هيلا
ياصحارى رملك حيخضر ..
أراضينا ، والخير راح يكثر ..
العاقبة بلدنا بتتمخطر ..
والقمحة راح تطرح كيلة
وهيلا هيلا ...
هيلا هيلا هيلا هيلا
شايلىنك فى العين يابلدنا ..
أفراحك ، زادنا وزوادنا ..
وأدى جيلنا ، سدك أهرامه -
من غير كرباج ولا ترحيلة
وهيلا هيلا ...
هيلا هيلا هيلا هيلا ..
تسلم دراعات الشغيلة
تسلم دراعات الشغيلة

ديسمبر ١٩٧٠

حكايات السفر الطويل

- وسافرت وجيت
.. من بعد ما جيت وسافرت
ويايا فانوسى اياه
وبادور بيه ، فى نهار الناس ع الحق
وانا قلبى حمامة وليفة وحلم ...
باحلم - يرتاح جوايا الفكر ..
ترتاح على سدرى حبيبتي - أرتاح -
من بعد سنين التوهة
واللف كتير ع الكعب
من بعد ما شفت الناس مرايات -
بتسود فى وشوش بعض ..!
..
- الناس أصحاب الكيف وقاتلها الكيف -
.. جواهم قتلوا الخوف
إن قالوا يقولوا الحق
وان حبوا ، يحبوا بصدق
وساعات ، ليهم فى الحكمة ساعات
مقالوش "هيهات" .. أو دهنوا كلامهم زيف
والناس أصحاب الفكر ورضعوا الفكر سنين -
.. زرعو لى طريقى برعب
دهسولى حصانى الطين
وقالولى ف عز ما كنت "اياك" -



من قبل ما أنطق حرف ..
إياك - وكتمت ف قلبي السر ..!
ملعون الحرف ، إن كان مقتول في الصف ..
ملعونة الحرب - لو يبقى رجالها -
في مكانهم دايرين لف ...
.. ..
- وسافرت وجيت
.. من بعد ما جيت وسافرت
على شط النيل ميلت ..
ولقيتها هناك وحديها دموع ع الشط
شاورتلي بطرف العين - عدت ..
ف احضانها بكيت ..
من قهر الغربة بكيت ..
ضحكتلي - ضميت الضحكة بقلبي فرحت
بالذكرى رجعت .. بالذكرى رجعت ..
وقريت في كتابها كتابي ، اول حواديت الحب :
الصفحة الأولى .. الصفحة المية .. الصفحة الألف ..
بتغيب في عنيا الصورة .. تعود وتلف ...
الكلمة .. الضحكة .. الدمعة ...
القاضي .. الجوعة .. الشبعة ...
البعدا كلاب السور ...
الحكمة السائرة وباقية - الموت -
من قبل ما ييجي الدور ..!
جدي الأول مقهور ..
جدي العاشر مشطور ..

وانا ؟.. - لمحوني ف ايدها مراية -
ضربوها ف عز احلامها ..
.. عدت بي جبال وبحور
لمحوني في ليلها بداية - غطتني بديل فستانها-
عروا اللحم المستور
حطتني ما بين ضفايرها .. قصوا الشعر المجدول
حطتني جوه عيونها - في عيونها وزرعوا الخوف
من خوفها عليا لخاف - حطتني ما بين نهديها -
ودارتني جوه غيطانها ..
.. حرقوا ليها المحصول
طارت حماماتي البيضاء ...
طارت حماماتي البيضاء ...

مارس ١٩٧٣

كلام للسويس

- واكتب بدمى غنوتك .. أحيى كفاحى ..
واغزل شبكك .. من ضى الشمس الصباحى ..
واطبع كفك على صدر الليل -
يصغر .. تكبر تكبر ...
وأشوف الدنيا على براحى ...
.....
- والضم عقدك
من كل شظية بترابك -
صبغت لونك بالدم
وارسم إسمك
بكل دانة على بيوتك -
رفعت صوتك ..
وازرع عزمك .
على كل زناد بيهم -
يحمى ، أطفالك وطيورك
... ..
- بانقش بالروح نياشين -
للشغيلة .. السهيرة على بترولك
واعمل من قلب الآه مجداف
وانسجلك عمرى ، شراع طواف
وأطلع بيكى للناس ،
أسقى الإحساس ، كلمة بكلمة

وارجع بيكى .. شايلانى وشايلك
بنغنى الغنوة فى حواريكى :
ياسفينة البحر ياسواحة
ياما نفسى أدوق طعم الراحة ..
ياما نفسى بلدنا تغنيلى -
وانا ع المدفع صالب حيلى ..

فبراير ١٩٧٣

مشهد العبور

"من أوبريت السويس حبيبتى"

الجندي :

كانت لحظة - فيها يمتحن الرب ، العبد

كانت لحظة صدق -

فيها يبان المعدن ..

.. إن كان لين أو كان صلب

يمكن فى الثانية الأولى ، دق القلب ..

يمكن بودانى سمعت الدق !..

يمكن العرق البارد غطى الجلد بردت

يمكن لحظتها شعرت بضيق فى الصدر

وان انا مخنوق ...

يمكن حسيت بصفير فى ودانى

وجفاف فى الحلق

الكورس : م الخوف ..؟

الجندي : يمكن - ما انكرش ..

يمكن ما حصلش !..

إنما فاكّر ، بأكيد .. وأكيد -

أبدا فى عيوني ، ما رمش الرمّش ..

ولا رعشت إيدى على سلاحى ..

كل احلامى .. فكرى كيانى -

ع الضفة الثانية الشرقية .. المسببة ..



بيقول راجع ... إبتك راجع ..
الكورس : إبتك ياسينا ، أهه راجع
الجندي :
أسئلة وحوار .. بتدور جوايا وتتجاوز
غليان ولهيب .. جوايا أتون ..
فيها إيه لو اموت .. هيموت الكون ...؟
الكورس : أبدا ...
الجندي : هتغيب الشمس ...؟!
الكورس : أبدا أبدا ..
الجندي :
راح اخاف السما تنزل ع الأرض ...
دا الموت موجود من قبل ما اكون ..
ولبعد ما اموت
الموت بخسيس ، لو أرضى بذل ...
تدهسنى الناس -
لما ابقي خيال ، وأسير فى ركاب العالم ظل ..
لو أشوف الراية غريبة على أرض واطاطى الراس ..
الموت فى العالم دلوقتى ، شىء إسمه الخوف ...
وانا عمرى ما خفت
من ست سنين وانا مستنظر ...
من ست سنين وانا مستنظر ...
- فى اللحظة الجد نزلت ..
مع كل الصحبة نزلت ..
وكان كنالنا مراية ...
فى الميه شفت صورتنا -

.. وإدينا رافعة الراية
وعيوننا بتحضن فى عيون بعض ..
دفعتنى الروح .. بالروح جذفت -
وصلنا الشط
م الفرحة حضنت الأرض ..
حنيت بترابها أيديا .. عزفت :
ياحبيبتى يامصر ...
ياحبيبتى يامصر

١٦ أكتوبر ١٩٧٣

السويس تغنى

رفعت راسها فى عز الشدة ..
نسجت ضى الشمس فى توبها ..
عزفت غنت -
غنى القلب الخالى محبة ..
محلا الغنا والمدفع صاحى ..
محلا صباحها ومحلا صباحى ..
محلا زحام الناس على بابها ..
عائشة بسويسنا الغنوة الصابحة ..
عائشة الفرحة وناصبة الزينة ..
شفت غناها ربيع فى المينا ...
غنت للأطفال وشيوخها وللشغيلة
غنت فى الأيام الصعبة -
ولسه غناها شراع وسفينة
طالعة تمد خطاها لبكرة وشائلة المونة ..
"هيلا هيلا هيلا ، مدوا الخطوة ..
هيلا هيلا هوبة المجد محطة"
خلى دراعك جنب دراعى ..
شمر .. عمر .. إرفع ياسطى
إزرع بسمه ربيع لعيالى -
فكك عالى وعزمك سكة ..
زى النجمة فى ليل العتمة -
مضيئة مضيئة



زى البسمة فى وش الصبح -
حبيبة حبيبة ..
زى النسمة الحلوة الرايقة -
رقيقة رقيقة ..
زى الموت والحيا والشمس -
حقيقة حقيقة
وزى الكلمة ان صدقت تبقى -
صديقة صديقة
زى الغنوة الحلوة وزى -
طالعة سويسنا وليدة جديدة ..
بنقول هिला ...
هिला هिला هिला .. مدوا الخطوة ...
هिला هिला هوبة المجد محطة ...

١٩٧٤/٩/٢٩

بيت القصيد

السويس تكبر وتصبح تاج على رؤوس العباد ..
السويس تكبر وباحلم ، أكون أنا سندباد -
ألف فى بحور البلاد ..
وف كل مينا أغنى لحن الناس هنا :
- محناش بنعشق فى الحياة غير العمل ..
بنربى أولادنا على حب الأمل ...
والفن لما نبدره ، يطرح ريحانة وسوسنة ..
- محناش كبار فى السن أو بنقول مقام ..
دا حنا كبار فى الحب والتار والسلام ..
واما نشيل يوم السلاح -
يصبح كفاحنا فى البلاد ، قصة وغنوة ملحنة ...

حكايتين للشعب

١- السوق

لما الكلام يصبح تجارة ..
لما الظلام يصبح حضارة ..
لما الأمور تتحل بعزومة سيجارة ..
لما الأصول تتداس -
وتطاطى للعييب والشطارة ..
قولوا (على الدنيا السلام)
إرخوا الجفون تانى ..
غنوا الألم تانى ..
واياكوا م الشكوى .. يكفاكم الأحلام !...!
يكفاكوا ما كفى العليل ولا طاب...
الجرح م الأصحاب
الندل والكداب
الغربة والأغراب
أفراح ، ولسة سراب -
والدمع ف اجفانى ..
الدمع أمس وغد ، صبح ومسانى ..
متأخذونيش فى الحق ..
متأخذونيش إن قلت :
لف الوابور يا الحباب ..
لف الوابور وتعبت ..



على أد ما تألمت والنصر أحياني -
شفئك يابلد (الغريب) م الغربية بتعاني..
على أد ما لفيت ورجعت بمعاني ...
شفت السنويس بتتن..
شفت الكلام بيتوه..
شفت الرجال القش -
صاحبى اللى كان أملى ، وباعنى بقرش..
الكدايين والغش..
المشغولين بالعرش..
الصبر ، موضة وفن..
وناس وشوشهم آه
وآه وشوشها الناس
الجن تاه فى الإنس
والإنس داب فى الجن..
على أد ما بيعلا البنا ويمد..
على أد ما صوت المصانع رد -
الضحكة مهووسة..
الضلة مكنوسة..
والكلمة فى جيوب مقاول الأنفار -
بالقرش محبوسة ..
ولكل واحد سعر
ويفيد بابه الشعر -
إن لم نكون أحرار..
الهمة فى الزرعة .. الفرحة للنوار..
ولكل موضوع حد ..

متأخذونيش فى الحق ..
متأخذونيش ان قلت :
لما الكلام يصبح تجارة
لما الظلام يصبح حضارة..
لما الأمور تتحل بعزومة سيجارة..
لما الأصول تتداس ، وتطاطى للعيب والشطارة ..
قولوا (على الدنيا السلام) ..
قولوا (على الدنيا السلام) ..

٢- بكرة إيه ..؟

*قلتها من صغر سنى..
كلمتى - وتر الربابة..
كلمتى - نغم المغنى -
عاشقة ، وبتعشق صبابة..
قلتها للناس بقلبي..
قلتها معنى وكتابة :
ياحبايى .. يا حبيبى..
كل غناويكم فى قلبى - كلمة كلمة..
بسمه فى الشرايين بتجرى
ياحبايى .. يا حبايى
قلبي غنوة من غناكم -
بس آه خايضة فى صدرى ..
خايضة بكره يا حبيبتي -
ياترى حيكون حقيقي
والا نقطة فى الزحام!؟..

قلبي أهة بغنوة وردى
خاففة يسرق بكرة تانى -
م الشفايف لبتسام !..
بكرة إية ؟..
بكرة مجهوله ابتسامته-
خاففة ع الوش ابتسامتى
بكرة مجهول الضبابة-
قلبي متكفف بحيرتى...
قلتها لكم .. مش تشاؤم أو خيانة
لجلكم باسرح بفكرى.....
لجل حرف الحب يرقص فوق شفايفى...
لجل أيامنا اللى تاهت واحنا غربة..
لجل غيط القمح يعمر بالمحبة..
لجل روح الشهداء تهدا...
بكرة لجل ما يبقى أخضر -
مش كفاية الحلم بيه...
بكره عايز ناس ماتهدا...
ألف ألف وألف عين..
إيد حديد - تقطع الإيد اللى تنهب..
كلمة حلوة -
تروى بالأفراح ما تتعب م السنين
بكرة عايز مسطرة ، وورقة وقلم -
وعيون مدافع سهرانين
بكرة عايز ، مونة معجونة بعرق ع المسطرين..
١٩٧٤/١٠/٢٤

خرزة فى عقد حب

* زرعت فى قلبى الحب ، نغم صافى ..
روت جناين القلب ، بمحبة وعوافى..
قطفت لى بايدها الورد - ياوردة -
حضن الغرام دافى ..
مديت لها ايد السلام بسمة -
رمت شالها على كتافى..
شدتنى م الرقدة ، ما بين الحزن وكسوفى ..
بالود غنت لى .. خرجت بى من خوفى ..
طبعت ايديها الحنة فى كفوفى...
ضممتنى ... ضميتها ..
حبتنى ... جبيتها..
وبنظرة فى عيونها ، شفت الوداد وافى
.....
* كتبت بايدى ع الصخور ، طالعة..
.. يا حبيبتى انا فداكى
* زرعت بايدى فى الغيطان ، طالعة..
.. يا حبيبتى محلاكى
* دارت بى دارت فى البحور دايرة -
.. يا حبيبى انتى القلع وشباكى
* طلعت بى سافرت للسما طائرة..
.. يا حبيبتى فين ما تكونى ، وياكى
غنت لى غنوتها وقلت كلمتها

مشيت فى سكتها ، ولا عادشى الغرام خافى..
يامصر حبيتك.. فى القلب حطيتك..
شفتك فى عين الشمس شموسة...
ضحكة ف عيون بنتى ، أم السنين خمسة..
غنوة وزناد جندى ، بالروح هناك ضحا-
واخر كلامه انتى
يامصر غنيتك وعشقت ناس بيتك..
شفتك لبالى الحرب فى الكوشة-
الحنة فى إديكى ، وولادك العسكر..
.. بيطرزوا الطرحة
غازلين خيوطها ، م القمر فضة..
من رمل "سينا" ترترة وخرزة..
بيزموها فى العرق والدم...
يامصر ، وانتى غنوتى الطاهرة-
ودى أقول قولى
وينسج غنوتك نولى-
وف طرحة فرحك الأكبر-
ودى أكون خرزة...
ودى أكون خرزة...

ديسمبر ١٩٧٤

سلام بالحب

الكورال : شايلىنك يابسمه.. بنزفك يامينا..
زارعينك ياكلمة .. نواره وجنية..
عرقانة ولادنا ، بتعمر بلدنا..
والعزم فى قلوبنا ، بينور طريقنا..
ياعزم السوايسة الصابح ياشراع السفينة..
فردى : باسم الله بدينا .. ع الأحزان مشينا..
طوبنا الليالى ، وغدر الليالى - ما طول علينا..
شموسة بلادى ، بتبوس الأيادى -
الإيد اللى تزرع والإيد اللى تصنع..
والإيد اللى سابقة وتهز الأعادى
شموستك يابلدى ع الافراح يضوى..
والنسمة لفرايحى فوق خذك بتسرى
بتغنى معاكى فى الرحلة الطويلة
الكورال: شايلىنك يا بسمه .. بترفك يا مينا..
زارعينك يا كلمة .. نواره وجنية..
... ..
فردى : باسم الله يا هادى وعليك اعتمادى
بنصبح يا اسطى يابو الصبح نادى..
بنصبح صباحك يحب المباشطة..
وأدى أرضك براحك والخامة الألسطة..
على الطوبة واعلا.. نعلابك يا مادنة..
بالإيمان حنقى الأيام تساعنا..

نرفك يا فرحة وتغنى الحزينة..
 الكورال: شايلىنك يا بسمه.. بنرفك يامينا..
 زراعىنك يا كلمة .. نواره وجنىة..


 فردى : وسلام ...
 الكورال : سلام بالحب .. سلام م القلب وغنىنا ..
 فردى : سلام بالنصر .. أغنى لمصر -
 وىامصر الطالعة الشغيلة ..
 سلام يارجال ، جاوینى یاخال -
 وخلقى الحب عرق سیال تحت الشیلة ..
 الكورال : هیلا هیلا هیلا
 فردى : سلام للشعب یدق الكعب ، تقول سینا ..
 الكورال : هیلا هیلا هیلا ...
 فردى : وسلام یاصباح ع الناس فتاح -
 وىابسمه وعرفت مراسینا
 الكورال : هیلا هیلا هیلا....
 فردى : سلام للعزم اللى بیبى ..إبنك إبنى -
 العود سارح وأدى العیلة
 الكورال : شايلىنك بابسمه .. بنرفك يامينا
 زراعىنك یاكلمة .. نواره وجنىة
 عرقانة ولادنا ، بتعمر بلدنا ...
 والعزم فى قلوبنا بینور طریقنا ...
 یاعزم السوايسة الصابح یأشراع السفینة ..

١٩٧٥

عزف منفرد

مديت لسانی وعف ..
طلع الكلام بنور
فتحت قلبي أشف -
بحر السنادى ، ع الطريق مستور ..
بحر السنادى بالربيع حيلف -
وينبت الزرعة ويدور الطنبور ٠ ...
خدنى الأمل وطلعت ...
خدنى وخذ منى وحط الشمس -
.. القمحة والمنتور
خدنى وخذ منى الصفار والهمس -
.. النظرة والمنظور
غنيت لأهل البيت -
طلع الغنا نوار ويبجلب العصفور ..
فى الزحمة دق القلب واتبسمت
ورعشنى دمع الفرع ع الأرغول ..
فى الزحمة ... ياه ، ما تعبت ...
ووقفت ويا الخلق جنب السور ..
وقفت خايف لاكين - حرف الكلام ما رعش -
.. الشجرة لما تشب والضلة لما تطول
دق المراكبى دقتين ع الدف -
(لكل واحد دور) ...

(*) الطنبور آلة اسطوانية خشبية تستعمل لرى الأرض.



ميل وعبي ، قوت لغيرك .. خف...
ميل وإملا من بلدنا سرور ..
ميل وعبي .. دق يابا الكف ..
ميل وغنى وصهيل الأرغول
- دقيت كثير دقيت ...
دقيت ونز القلب حب وطف ..
(الصورة دى وردى ...
الوردة دى ليكى)
دقيت عشانك وجيتاك -
عريس جديد باتزف ..
طمنت قلبى ياشهر زاد وحلمت ..
قربتلك خدى وخذتك من بعد ما ولقت ...
خذتك فى حضنى جوه قلبى وجيت -
فى الليلة بعد الألف ...
ودرت بيكى ع السنين وعزفت :
"الليلة دى لاغول ولا غفاريت
الليلة دى الحب .. إحنا وبس
الليلة دى - دندن ياو ادع العود ..
.. إية اللى عندك يحلى بيه العزف ..؟"
ترم ترم تم ... بكره عشانك جى -
أبيض حليب القلب .. ملوش مثيل أو زى ..
ترم ترم تم .. بكره عشانك ضلة .. حب وشمس ..
بكره عشانك حيطرح ، خضار وطاقة ضى...
ترم ترم تم .. ترم ترم ترم ...
تطام تطام طم .. تطام تطام طم ...

دق الغيلان ع الحلم ..
رعش النغم فى الحلق ..
نخ الجمل بالحمل ..
تاه الحمام ولاحظ ...
بصيت بقلبي المعجباني رجفت ..
بصيت بطرف العين ، رخيت الجفن ...
نفس الزمان .. نفس العيون ..
نفس الإيدين بالدم !..
زرعت بلدنا الصبر لقمة وذل ..
خدتك فى قلبي ياشهر زاد وجريت ..
مشيت كثير وحفيت ..
عديت بحور ووقفت ..
... هنا .. هناك .. وهناك
وبعزم ما بي صرخت :
"ياخلق هوووه .. ياخلق"
"ياخلق هوووه .. ياخلق"
وإنا اللى برضه سمعت
أنا اللى برضه سمعت

يونيه ١٩٧٥

أذكركم فى عيد النصر

- مقالوش بكام العمر فى عصر المزاد ..
- .. ولا قبضوا عربون الثمن
- مقالوش لمين الشهرة ولمين الإيراد ..
- .. أو مين حيكسب فى النغم
- مقالوش لمين .. أو ليه - ولا فكروا -
- مين اللى بكره يطل ع العيلة
- ويعدل الميلة ..
- ويرعى الطفل ويصون البنات ..
- مقالوش ولا اتقفوا .. لكنما تقابلوا -
- .. طريقهم مصر
- يامصر الهوى يامصر
- مصر العرق والخير .. والغلة فى الطواحين ..
- مصر الربيع والنيل .. الغيبة والراجعين ..
- مصر اللى داسها القهر ، داست قهرها وعدت ..
- مصر التروس والفاس ، بالناس ولا كلت ..
- مصر النهار بتقول ، والكلمة للطالعين ..
- مصر أيوب العفى
- وست الدار وجر جس واحمد الجندى
- ومصر النصر فى الميادين
- مقالوش ولا اتناقشوا ، فى "حيث ولأن
- أو فى البند ، حين يسمح" !...
- مقالوش ولا اتجادلوا ..

.. فى مين حيعيش.. ومين حيموت ..
ومين حيبان فى الصورة ع المسرح ..
- مقالوش ، غير ان الشمس غيمانة غيامة قهر ..
ولا دارت فى أفكارهم -
غير ان اليد لو كلت .. دى تبقى فى الرجال عيبة
ووصمة عصر ...
كان آخر كلمة فى لسانهم "عمار يامصر" -
بتهتف للنسيم صابح ، وتهتف بالغنا تسابيح ..
بتهتف للكلام واضح وسابق الريح ...
بتهتف للناسات فى الحب ، لما تحب وتقدر -
وتجنى من غيطان الحكمة زوادة ...
عن الإنسان فى لحظة صدق - كيف يقدر -
يسطر بالعزيمة تاريخ ...
باقوالها لكم ، وهمس القلب قال اكثر ...
وباكتبها كلام ياسويس .. كتبها بدمهم ناسى ..
كتبها الشهداء فى أكتوبر .. باذكركم ، ومش ناسى ..
دا انا صاحبي اللي ضحا العمر وادانى ..
دا انا المكتوب على جبينى هنا بدمه - أعيش تانى ..
.. أدوق من خيرها واتمتع ، والم نسيمها ف احضانى ..
وايدر حبي فى الرملة ، شمسها الحرة تملانى -
.. بلا دمعة ودون أحزان
أنا المكتوب على قللى هنا بأملى ؛ حكاية العمر أحكيها ..
حكاها الدم من قبللى ، نسخها الدان
كتبها الناس بضوافرهم ، على الأسفلت والجدران ..
كتبها عليوة وابو خاطر ، وعم سويلم البقال أبو العيال ..

وناس مجهولة أساميهم فى دنيتم ، كما فى دفتر الأحوال ..
وحين يبقى الشرف غالى ، يهون الموت ...
وحين ننسى ونتواكل ، ما نستاهل يامصر القوت ..
نسيتم واللا اذكركم -
بابو هاشم وحامد و ابراهيم سليمان ..
بكل الشهداء فى بلادى اذكركم ..
نكل الشهداء يابلاى أطاطى الراس
وأحنى الهامة للراية ...
فى أعيادكم باذكركم واقول بحماس :
أحب الغنوة فرحانة وذات معنى ..
واحب الذكرى تجمعنا ضمير حساس ..
أحب الناس ...
وناس تنسى فى ذكرى نصرها الشهداء -
متيقاش ناس !!
وعيدهم مهما كان زينة ، مبيقاش عيد!!

١٩٧٥

فى ذكرى ما جرى

الغيط نبيل ...
اللون أصيل ...
واليسمة فوق خدك صفا ...
والنظرة منك سلسيل ..
يام العمار والسلطنة
يامدندنة - لحنك ياناعسة المنتشى -
بيهزف ايوب الغنا ، رغم الأئين ..
قلبك وفا وانا باعرفك -
صبارة وانتى دمع عين !..
عارفك كده .. انا باعرفك -
أما تتادى الشمس وتجيلك حنين ..
سامعك أنا .. أنا باسمعك -
أما تتاجى الضلة وتلاغى النسيم..
واما يضبع مروى الحياة -
نلقاكي طالعة بتزرعى قلبك سبيل ..
يام الحياة صابرة الغنا ..
عشت الحياة على مركبك -
شفتك أميرة ع السنين ..
شفت العمل ، فرط على سدرك عرق ..
شفت الحياة مجداف أمل .. شق القلق -
.. وانتى عروسة الشغالين
يامركب الأحلام ياناعسة -



الحلو بس .. یعنی ایہ..!؟

.. يعنى كلام يقدر يقول عنك غنا -
لما اسمعه ، أنسى العنا ...
الحلو بس .. يعنى إيه..؟!
.. يعنى رجال تقدر تعالى فى البنا
وتمد لك بالقلب .. وتمد لك باليد -
ألقاكي جوه عيون حبيبي بالأمل متكحلة ..
الحلو بس .. يعنى إيه..؟!
.. يعنى العمل .. ونشوف علمنا فى السما ..
وان جت تزررنا محزنة -
نلبس لها التوب حديد ، ونقوم سوا
نضرب على إيد الخيانة ، لو تفكر تجرحك ..
متأخذيناش يامصر ، فى القلب دايم مطرحك ..
وبكره حتشوفى الكلام -
لما أجيلك والمحك ، دايسة الظلام ..
والنبض صدق وضى ..
يام النهار الجى .. غنى لبكرة الجى ..
غنى معانا للبنا يطلع جديد -
ياللى مازيك زى ..
الشعب ، مهما الليل يزايد -
الشعب حى ..
الشعب حى ..
الشعب حى ..

١٨ يناير ١٩٧٧

مواويل للمواويل

(١) عصفور كناريا جميل ، صبح على ومال ..
همس لقلبي العليل ؛ بكلمتين مرسال :
"مالك حزين شارد .. اية غير الأحوال ؟..
ردت دموع عيني - صعبان على الناس -
القرش سلسلهم والحب مش ع البال !..
.....

(٢) الدنيا أخذ وعطا .. مهش كلام وحماس ..
دار الزمان واشتكي من غربة الإحساس ..
ياما ناس حياتها لنفسها ...
وهو واحد أحد ، عاطى لكل الناس ...
.....

(٣) الموت ده كاس دوار ، على العباد بيفوت ..
السكرانين به كثير ، زى الهوا والقوت ..
كاسك نديم كاسي ، والكل بيعبى ...
بنموت ونتاكل والرب لم ييموت ...
.....

(٤) دنيا غرورة صحيح .. مين فينا ما تغرش ؟..
مين فينا قام صدها ، بالحق واتحمس !..
مين فينا داق الحب ، ياخلق ولا حبش !..
مين فينا قلبه ملاه الصبر ولا كلش !..
.....

(٥) من قبل ما نتولد مكتوب نقابل بعض

أنا زرعة في ضفتك وانت المدد والرد ...
ده انا اللي ياما شربت ، وأكلت من خيرك ...
وحاربت بيبك يانيل حرب الشرف والعرض ...

.....

(٦) نزلت سوق الحمير ، أشتريلى حمار ..
يشيل معايا الهموم ، فى الشدة والأسفار ...
وف عز توهة الزحام ومساومة السمسار -
لقتينى مرمى طريح ، مبلول بسف غبار ...
سألت راجل حكيم ، فجأوبنى باستتكار :
"ياابنى الحمير أعلنت الثورة ع التجار"

.....

(٧) صاحبى وداريت عيبه ، ما قلت عليه -
يمكن يفوق تانى
رديت كتير غيبته عشان احميه -
م العيشة وحدانى
واما صفاله الناس وابتدوا يسامحوه
.. رد فى وشى الباب - الندل .. أبكانى !!

.....

(٨) الأرض طرحت قمح ، والتمرع النخلة ..
المية مالية القنا .. يعنى الحياة سهلة ..
لكننا بنخاف ، نطلب كرا ايدينا
واحلو فى عيننا النوم فى الوحلة ..

.....

(٩) قالولى طاطى حتعلا وتبقى م الأعيان ..
تملك ايديك الذهب وتجالس السلطان ..

فكرت لحظة وبكيت على كل من طاطي -
ما نابيه غير العدم والوحدة والأحزان ..

.....

(١٠) شميت على البعد ريحتك .. صحيت ..
لمحت طيفك بيمرق قصادي - وراكي وجريت ..
لقيته يقطف عبيرك ويؤمر - بكيت -
على العمر مرة وع القلب حسرة .. ومن نفسي آه
ضريير كنت باحلم ، أطيير عند غصنك وجمعنا بيت ..

.....

(١١) السبع ودع وفاتنا .. راح الكرم والأصالة ..
السبع أسعد حياتنا .. وكان كلامنا المنارة ..
دوري يا عتمة ولفي .. واهدى الأعادي البشارة -
السبع في القبر مكفى ، والكلب فوق الطوالة !..

.....

(١٢) ليه لما بضحك تمللي ، تسح عيني الدموع ..
واشعر بقلبي الرقيق ، مشقوق ما بين الضلوع ..
سألت واحد بي فهم في الطب والإحساسات -
قاللي ده داء الغلابة من الأئين والسكات ..
واسأل تاريخ "الجبرتي" واللي انكتب ع النجوع

.....

(١٣) الناس حالات وحالات - بكده وكده ..
ألوان كتير مزاجات ... غريبة متعددة ..
فيه ناس الفكر بيسافر لها - يقعد معاها وينجلي ..
وناس تشوفها كل يوم وكأنها -
.. ملهاش وجود ، وتمللي هايفة ومقبضة ..

.....
(١٤) الغربية غربة روح .. مش غربة سفر ومكان ..
الغربة لو تحتاج ، ويهدك الحرمان
لما الجريح يصرخ ، ولا يلاقيش إنسان ..
لما الغنى يفجر ، ويملا بير مليون ...
لما بننكر بعض .. ننتناسى ما بننسى !!
لما بننهش بعض .. ونغرق المرسى !!
الغربة ملهاش بيت فى عالم الحيوان !!

.....
(١٥) النيل جداول جداول ، وحبيبتى محروسة ..
يام الشعور الجدائل ، يا قمره وعروسة -
إسقينى واملى القناني يام العيون الأغاني ..
من تانى يامصر تانى - قلبى بيعت سلامى ..
.. ميت بوسة على بوسة

.....
(١٦) الدنيا مركب وناسها ، غاويين خيانة وغرق ..
الدنيا مركب شراعتها ، هذه السفر والسبق ..
والبحر غامق غريق ، يعشق حطام القلق ..
أه يا صديقى الصديق -
خايف تفوت الطريق ، والصحبة تطلع ورق !!

.....
(١٧) نزلت سوق الحياة ، أجيب فتاوى وحل ..
لقيت حوارى الحياة ، سكرانة صبر وخل ..
فيه ناس بتتزف عرق ، تتعب صحيح ماتمل ..
وناس بتلعب ورق ، وبيتعبوا م الضل ..

.....
(١٨) الدنيا واسعة وضيقة ...
محيط ، وأيضا شرنقة ...
مهما يتبعنا الظروف ...
وتأخذنا من بعض الكيف -
بنلتقى ساعة الشقا..

.....
(١٩) أحبك أحبك .. واحب أكثر صراحتك ..
أحبك أحبك .. وباكره جفائك لأهلك ..
بحبك بحبك ، لكنى باكره أقابلك
.. مزوق كلامى وباطعن فى ظهرك ..

.....
(٢٠) الصبر له ع القلوب والحياة أحكام
فيه صبر يبلى العقول ويضيع الأحلام
وصبر ملهوش نصيب فى لعبة الأيام
وصبر يقتل شعور الحس - لو تعلم -
فيه صبر ندل خسيس، مالى البلد أيتام

.....
(٢١) مكتوب أقول ع المخبى ، وانور لغيرى ..
مكتوب اطواعك ياقلبى ، واغنى لطيرى ..
ولو عقلى قال : "ياللا نفسى" -
.. يخاصمنى قلبى ويزعل ضميرى

.....

١٩٨٠/٦/٣٠

كلام فى الغربة

* إزرعى بالخضرة قلبك .. إزرعيه ..
إغزلى الكتان لتوبك .. إغزليه ..
وابنى بيتى بطمى نيلك - يوم أجيبك -
.. حلقى نفسى ضحكة طالة
وانتى هالة
بالأمل يحضن غرامنا ويناجيه
إملى تانى قادوسى غله
وافتحى بابك ياغالية ..
اغسلى بالشمس شعرك .. واطرحيه ..
رجعى البسمة يانسمة
واطلعى للنخل عالى .. لا تنامى
هزى هزى، وابدرى تمر ك أغانى وعطريه ..
رجعيني ارضع حنانك .. رجعيني ..
رجعيني جنين فى بطنك واولدينى ..
نفسى اجيلك كلمة صابحة -
تروى جرح الآه بصحبة وتداويه ..
.....

* إيه وإيه
أمنيات العمر شاخت ، لما تاهت ذكرياتى ..
كان أنيين القلب ساكت ، إنما مجروح يوماتى ..
كنت خايف وانتى عارفة - ليه أهاتى !..
كنت تايه وانتى لايفة -

.. ع اللى باعوا ابنك بدرهم، سكروا بيه ..!

.....

* ايه وايه

كلمتى ع الباب تتقر .. افتحيلي -

اسمعى قلبى المهاجر .. مش لاقينى ..

قلبي ساكن لسه عندك - بينادينى ..

ودى اجيلك - بس اشوفك مش بطبعه

ودى اجيلك .. بس خايف تكسفيني -

تقفلى بابك بقفله


ياللى أنا المحبوب رهينك -

نفسى اجيلك .. بس قمر ك مش لاقيه ..!

١٩٨١/٨/١٦

دهاليز المونولوج

* سألت نفسي إية جرى في الساحة ..؟!..
بنطاطى ليه للتوهة والنداهة ..!
واحنا اللي صييتنا كان نشيد العالم -
الحب شرقى والغرام بنزاهة ..
- قالتلى إرجع للتاريخ يا ضنايا ...
إفتح كتاب الصدق واقرا معايا
حتلاقى لما الدنيا دانت لنا -
.. نسينا مبادئنا العظيمة القيمة
وقعدنا ندبح بعض نكتة وقافية -
لا قلنا عيب ولا حتى قلنا كفاية ..!
* سألت نفسي ، إية جرى يابلدنا ..؟!..
الضحكة باهتة والخلاف بقى زادنا ..
- قالتلى إحنا اللي هدمنا المادنة -
وعملنا م الضعفا الصغار أسيادنا
وقعدنا نبكى ع اللي ضاع بوقاحة ..!
* سألت نفسي ؛ إيه جرى لصحابنا ..؟!..
سنين كثير ، ماخبطوش على بابنا ...
يا هلترى كرهوا ما فينا .. عيوبنا -
واللاحدان الحب مات والراحة
- قالتلى عيبك .. كلمتك .. سلطنة ...
الصمت عندك - فى الحقوق - ده خيانة ..
وده ف نظرهم نوع مرض مستعصى -



لا طب فيه ينفع ولا شفخانة !...!
*سألني صاحبي ؛ عملت إيه فى الدرجة ؟..
قلت له ؛ فاضل خطوتين ع الحركة ..
قاللى لأ إنسى ، وافهم التوليفة ...
واعمل طناشى ع الأمور الجيفة ...
حالا تتول الخطوة فى التشريفة -
ويحطوا إسمك فى كشوف البركة !..
* سألتنى نفسى ؛ الدنيا ليه مقلوبة ؟..
.. مقلوق كلابها والسباع مقلوبة !
- قتلها عيب .. ما تسألش عن حاجة -
فيها المفكر لينا ، بيه وخواجة ...
ياميت ندامة ع اللى فهم المعنى
ولا سلامة للديول العوجة !..
* سألت نفسى ؛ لو تهاودو وابكى -
أمسح همومى بدمعى واغسل فكرى ..
- قالتلى فض السيرة .. دى مش سكة ..
ينبوع دموعك جف ، شكة ف شكة ..
لو شفت يوم القرد بارم ديله -
إفخت عينيك برصاصة أو بالسونكى !..

لغة العيون

همس العيون عالم تانى .. تانى وتانى ..
بيخطف القلب ثوانى .. وكانى ومانى ..
بيقول كلام محناش أده .. يعنى ياجدو -
بتكون قتيل تصبح جاني .. أه يازمانى -
هات البرهان :
- عيون صريحة ونار قايدة -
بتقول رايدة -
تولعك على نار هادية -
كامنة وزايدة -
وتفجرك جوه الأحلام ..
- وعيون تقولك ؛ ياعنيا -
إنت الدنيا -
وتقتلك يابا ف تانية -
وتموت خسران ..
- وعيون كحيلة سهتانة -
.. منهم يانا
بتقول ياواد أنا عطشانة -
أنا عطشانة
هاود واسقى الرمانة
إفهم يا حصان
- وعيون تقولك على مهلك -
قلبي ند هلك

دوقنى من شجرة شهدك
وانت الكسيان
- و عيون تنادى عليك وتلوف -
.. كده ع المكشوف
بتخدرك ، تصبح ملهوف -
.. عكس المألوف
تفضل يا ولداه تتوجع -
وتيات سهران
- و عيون تغمض وتسبل وحاجات تهبل ..
تسمرك وانت مكانك كده متبرجل ..
من قبل م تقول ؛ تتعدل
يخطفها منك واد فاهم ، وتطير طيران !..
- و عيون رموشهم قتالة .. قلبى ياخاله ..
سهامها صابية وعمالة -
بتعطش القلب العطشان !!
- و عيون كده هامسة وناعسة -
.. تسقيك رعشة -
بتكهريك من غير لمسة - وتنام تعبان !!
- و عيون تقولك ؛ أنا مالى .. قابل خالى ..
وروح لابويا ارمى بياضك .. تبقى حلالى -
ولا حد غيرك خيالى ، وانت السلطان !..

إلى الباحثين عن وظيفة عصرية


بيمر عام ... وعام وعام .. وبعده عام ..
دايرة بلا حصان أو لجام
زحام زحام
وكل عام وانتم بخير ...
بينسرق ، أحلى ما فى العمر - الأمان
والدور على رغيف الشعير ...
وأنا قلبى جوه الشرقة -
بيقول حكم .. لكن لمين ...!
بيرن صوت المطرقة، الإنفصام :
(سيبك من الحب القديم-
وافتحلى صرصور الودان)
.. يا أيها الإنسان نام
.. لا تكتتب .. لا تنتشى
.. لا تختلف ، بل فارتشى -
تظفر بمرسوم السماء ...
قطط بلدنا الطيبين
النابهين .. الواعدين .. المغرمين بالانعدام ..
... ..
* ما اعجب انك تبتلى بالإبتسام -
وانت عينيك بحرين دموع
وما أغرب انك تدعى شرف الشبع -
والجوع بينهش فى الضلوع ...

وما أخيب البطن القنوع -
في عصر أسياذ الجشع ...
- حرك تقول إنك جدع -
لك في المضاربة وفي الودع ...!
دا انا كنت أجدع من كتير ..
باكتب قصص وكلام كبير -
أصلب من الصلب وعجب
ولقيتها شغلة ما تتضمنش ..
(فركوكة) فوق واحنا اللي تحت ..
مهما تقول .. هيهات يا "درش"
دا القرش بيه ، عويم و "قرش"
جرب وشوف .. إكيش وغش ..
وان رحت تخطب بنت ناس -
فانت الوسيم .. وانت الغزال
وانت القمر - بدر وهلال -
مهما تكون أعور هزيل
أو حتى ليك قرننين وكرش !!..

١٩٨٩/٢/٢٠

الوشوشة على موسيقى الجاز

خُفْتُ أنسى الشعر خفت .. قمت ومسكت القلم ..
زفنى وسألنى ليه ؟!.. -
.. هو فيه حد انظلم !!
دى الحياة معدن وعال ..
والأمور آخر تمام ...
وأميركا - كل يوم بتمدنا بالدولار والقمح
وبلحم الغنم
يعنى تقعد مستريح ، حتى لو الجرح قَيِّحُ
والضمير زق القدم
قول نعم واعمل عبيط ..
واوعى م البحر الغويط ، تفضل انت المحترم
لو يقولوا ؛ المية خلصت م المحيط -
إنخرس وبلاش غشم
وارضى بالمقسوم لبيتك فى الغبيط -
وانسى أحلام العشم ..
هو ده زمن البليد والحويط -
واللى معنى الحس فيه مات وانعدم ..
.....
* فيها إيه لو تتحنى وتقول تمام ..
أو تنسحق تحت الزلط!
ده صديقنا العم "سام" ما يحبش الفهم الغلط
أو أى "ثورة" تقول ببيان ، بعيد عن الخوف والعبط ..



شفت عمرك يوم هنا زى الهنا اللي احنا فيه ؟..!
مرتاحين صامتين
برضه أحياناً بنشجب
أو بنرفض ، واحنا آخر سلطنة ...
- عندك ايه هيهزنا ؟...
قوللى ايه هيدلنا !...
الكتابة ؟... ! ... قوللى راح تكتب لمين !
دا انت ياما كتبت ياما .
والديابة سققولك مرة يمكن ،
واللا يمكن مرتين ...
والسيادة ... أنت عارف - يعرفوا فى المستحيل
هو ده فن السياسة
والسياسة دراسة "ملعب" مش حماسة
أو كلام منظوم يصور -
وصمة الخوف والنجاسة
وانت عارف - لعبة الدادابان وشايف :
لما يبقى الوالى خايف؛ يبقى لايف ع الغلبة
لوفة الديب الجريح ..
ياكل الحصرم معاهم وينادمهم -
فى الغنا ولعب الربابة ...
واما جرحه يخف حبه -
يدهس الصحبة القديمة والقراية ..
والصديق ، أول ذبيح
هو ده فن السياسة ...
المصالح بالكياسة ..

والكياسة بالفراسة
والفراسة عايزة مكر -
.. يعنى يبقى ملكش لون
تقبض الناولون تمللي -
صرّة فى حسابك تجلى
أو عطا مرساه يجيللك وانت نايم -
.. لامناقصة ولا حراسة !
فاضل ايه تانى اقولك ، وانا شرك والصديق ..
يعنى لما باقول ، بادللك على المكاسب والطريق
برضه لسة ناوى تكتب .. إنت حر ...
بس بصره ، يكون فى علمك -
لو حصلك .. أنا من دمك برئ!!

١٩٩٣

البكاء للداخل

* ساعات .. ساعات
باحبى على العمر اللي فات -
يملانى زاد .. وزاد وزاد ..
من غير منادى ولا مزاد -
بارضع من الحلمات آيات ..
* وساعات .. ساعات ...
بأنده على الماضى اللي فات ..
لما بتجرحنى الحياة -
.. بتصحى فى الذكريات
واما باشوف نفسى القديم -
.. بالقى النديم
وباشب فوق لعشر قامات ..
* وساعات .. ساعات ...
باحلم بقلب كبير عفى -
لصديق وفى
أندهله .. ينده ... يوافى فى الميعاد
نغرف من الصديق الندى -
لابينا سور ولا بوابات ...
* وساعات .. ساعات
باحلم بضحكة إنبساط
تشجيني لحن بميت وتر -
لما اغزله ، ينسج مكاحل للبنات

ساعات .. ساعات -
باتمنى اشوف كل البشر مش أنتيكات
* وساعات .. ساعات ...
باشتاق لنفسى أضمها ..
تسقينى من شهد الوداد
بتلمنى وبالمها -
م التوهة والخوف والسبات ...!
* ساعات ... ساعات -
باتدارى فى لحاف السكات ..
أنام .. أقوم - ألقانى فى نفس الشتات
وغيوم هموم - ترعشنى ، يهجرنى الثبات ..!
- صعب أنى أبقي مش أنا ...
صعب ان اكون بينكم وأبقى مش هنا -
صندوق بقل
هيكل .. لا حس ولا غنا
خيال مآته بلا انتساب
مع إن أنا نفس الملامح والسمات
نفس البلد .. الإسم وتاريخ الميلاد ..!
يا هلترى ، هجرتنى روحى المؤمنة -
بالحب والناس البساط ..!
واللا أنا عفت الحياة بالغبرة مزروعة بأهات ..!
* * *
آه يا حبيبتي باندهك ، ما تردنيش
قربك نغم .. حضنك ونيس ..
اللمسة منك عمر فى كتاب الحياة -

وبحور مدد ...
الفكر مسجون في الجسد ...
وانا نفسي افتح له الساحات ..
ساعات ساعات .. ساعات ساعات -
باشتاق لرقصة انفعال ..
باشتاق لأخلاق الرجال ..
واهوى الجمال ، واحبه أكثر في الحلال ..
واشتاق لندعه من المطر -
تروى العطاشى والنبات ..
ساعات ساعات ..
ما أصعب الخوف والشتات !!..
ما أصعب الخوف والشتات !!..

إلى روح الصديق الفنان

عبد الباقي عامر

- كان مراكبي ف بحر هايج -
- الأمل أحضان شطوطه ..
- كان عزيز النفس صادق -
- مهما كان الموج يحوطه ...
- كان يحب الصبح صابح -
- بالندى يوشوش خيوطه
- كان نديمي وكان أمني
- وكان في نبض القلب فرحي
- ودمع عيني
- لو يضيق الصدر واسرح -
- ألقي همسه بيناديني ...
- يسقي جرح الآهة بلسم -
- من صفاء ، وبصدقته يقدر - يحتويني ..
- كان في عز الصعب سكة ..
- دنيا من عالم مميز ، في العطاء -
- وصديق صديقه ..
- لو تغيب في العتمة نجمة -
- يحتوى العالم بضحكة
- وان يتوه فجر المودة -
- الدموع تخنق خطوطه ..

كان كتاب مفتوح ، بنقرا -
الحروف الصادقة قوته ..
كان في عز الأزمة نسمة -
نبضها الإنسان شروطه :
(يا ولاد مصر العظيمة -
الحياة بستان مودة ..
يا ولاد مصر الكريمة -
بكرة أحلى من النهاردة)
بكرة عنده ، كان بيحمل شئ له معنى ..
الحياة أحلام وذكرى ..
والصديق بالصدق أبقى ..
كنت يا (باقى) الصراحة ؛ وبالمجاملة -
وردنا الفواح وشوكة ..
نلتقى والكون يساعنا ..
نفترق مهما اجتمعنا ..
الحياة مركب ورحلة ..
كل واحد له محطة
والجميع مرهون بدوره
كان يقول والصدق قوله :
.. الولاد والصحبة مأوى
.. الأمل بالحب أقوى -
بس لو نفهم شروطه
كان بيحلم .. كان بيحلم ..
والقلم والريشه صوته ..
الصحاب كانت بيوته ..

والألم يعصر فؤاده -
لو تخاصمه الريشة وتطول سكوته ..

أغسطس ١٩٩٣

صفحات من هموم إنسان عربي

* الكلمة زوادی ..

وزادی فی الحیاة إنسان
إنسان شدید للحق ، صلب وزان -
يقدر يقول الكلمة فی ميعادها ..
وبيعدل الوزان
- الكلمة زوادی -

تسرب دمعی دم ولوم ..
حروف بتتشدد غنوة المهموم ..
ونشیج بیکشف لعبة الأيام ..
العصر سادی والطریق أشجان
باشرب عصیر الصبر یا بلادی
والصبر صار إیمان
ياهلتری نبض الكلام معلول
واللا الضمیر مشلول
والأمر للسجان .. !!

.....

* صوت الحقوق رهوان

لكنه مش أكبر
صوت الحقوق ألحان -
لكن بیتعثر
بیضل فی ساحة الزحام ویتوه -
والدم ینشع ع الطريق أیتام

فى عصرنا المكروب ، صوت الحقوق مكروه
بينشز المطلوب وبيقلق القاضى
لو يوم تنادى الحرة ، يا بلادى -
(الفيتو) حاكم ، والقرار مشبوه ..

.....

القاضى فض العدل واستقوى ..
القاضى مش أقوى -
إحنا اللى ضيعنا السنين أوهم ..
وسابقنا بعض نقبل العتبه ..

.. ونقدم القربان
ضو الطريق مخنوق ..
ظل الطريق أحزان
مين اللى يقدر ينجد المشنوق -
ويروض السجان .. ؟
مين اللى يقدر يفهم الملعب -
ويصحصح الطرشان .. ؟
مين اللى يقدر مين .. ؟!
مين اللى يقدر مين .. ؟!

.....

- صوت الخطب رنان ..
بعض الخطب تلميح ..
فيه صوت هزيل ونحيف
وصوت بعزم الريح -
ماينجرف بطوفان ...
صوت الشعوب هادر ، بيطوع الأزمان ..

مين اللى خلى الخطو يتعثر -
وأطلق الخصيان ..؟
مين اللى شوه صفحة الأيام ..؟!
ضاعت حروف الحكمة والأسباب ..
طواحين هوا ، تسحبني فوق ..
طواحين هوا ، تخسفنني تحت بدون جواب ..
مغزل بالف بدون نظام ..
أخرس ومطلوق اللسان ..
كل الكلام محموم ...
شكل السنين مقسوم ..
مين اللى بكرة يطاطي للقاضي ..
ومين يا بكرة يقبض المعلوم !
* * *

* إيه اللى فى الأخبار وفى النشرة ... ؟
قال باللسان معوج الطبع والمسلك :
(شعب الصومال بيמות).....
الجوع نشب أنيابه واستشرى -
ثمن الطعام مشروط ..
همس الحياة مكبوت
عديت أيادى النجدة يا بلادنا -
مكموش عشرة
الدور على الشارد والرحمة ع المربوط .. !
..
* إيه اللى فى الأخبار وفى النشرة ... ؟
قال والكلام .. ممجوج النبض والمسلك :

صمتا .. فلا تسأل
وإشطب من الخارطة .. "اليوسنة والهرسك"
حاذر وصون درسك ...
الصرى ، دى لعبته .. والغرب ده عمه ..
الغرب لا يهمه -
إن ماتوا بالألوفات أو ماتوا بالملايين ..
الجلادين عارفين
لا فرق إن كان كهل -
أو كان جنين مكنون ، لسه فى بطن امه ..
والمسلمين ... يا سعدنا - اهتموا -
بالشحب فى الجرائين !! ..
..
* إيه اللى فى الأخبار وفى النشرة .. ؟
قال باللسان مفلوت -
"ليبيا صارت بلا صوت ..."
.. بتمثل الطاعة وتقدم المضبوط !
كتمت دمعى المبتلى حسرة ، من عتمة المخطوط ...
باصرخ بقلبى المبتلى .. يا "بلال"
هز الهلال يا "بلال"
ما حد قام م النومه يتوضا ..
ولا حد هد السجن والأغلال .. !
..
* * كثير عددنا كثير لكن قلة ..
كثير عددنا كثير لكن علة ..
والدمع عاصى والطريق معطوب ..

الانتكاسة عيبة ومذلة ..
الإبتكار مشطوب ...
الاتفاق مصلوب
سوق النخاسة العصري آهو منصوب ..
والنخاسين ، حسب السنين مزاجات ..
سوق النخاسة لسه ما اتفضش -
بس احنا مش شايفين ..
كل العيون متكحلين دولارات !!..
كل العيون متكحلين دولارات !!..

يوليو ١٩٩٤

السنين الميتة

* لون الأمل وردى ...
هم الغريب قناطير ...
ردينى يا أرضى -
إبتك غريب وأسير ...
إبتك وليدك ، وده يحبيلك -
يحضن ضفاف نيلك
ويمد قلبه سبيل ...
يا هلترى سمعانا يابلدنا -
واللا الحياة أعاصير ؟!
يا هلترى سمعانا يابلدنا -
واللا العصاة سايدين !!
بيتاجروا فى ترابك
ويبيعوا تبرك بالأجل والدين ..
ماتدمعش يا عين ...
ماتدمعش يا عين ...
- هذا زمان الإنفتاح الإفتتاح
والإنشراح المغتصب والزمارين
- هذا زمان الشين وتجار الهوى
هذا زمان العهر على عوده استوى
هذا زمان ، طب النفوس معلول -
والحق فى الزنازين !!
.....
* النيل سجين .. سجين سجين ..

كل مايبدر حياة أو يتسم-
بيجلدوه السجانين
بيقطعوا لحمه النميل
ويوزعوه ع القوادين
دى يد مين .. ودى يد مين-
يامقتولين بالانتظار...
دى يد مين .. ودى يد مين-
يامشغولين بالفلسفة وأدب الحوار..
نام النهار جوه الحصار
والضو فيه أصبح ضرير ...

.....
* فين يابلاد السندباد حلم العباد ..؟!
فين ياحمام البر معزوفة الولاد ..؟!
الشيب علينا حط ليه قبل الميعاد..
والراحة ملهاش فى الحشا سرسوب دليل ..!
الجوع نذير ...
الخوف سغير ...
الصدق متكفن عبك
والكذب متقمش حرير..
آه يا حبيبتى من الأسى-
مكتوب ، ومحوبك عليل
آه يا حبيبتى المؤنسة-
قلبي بعيد عنك هزيل ..
هزيل هزيل ، ولا بديل..
الموت عدم

والصمت موت
الخطوة ضاعت م القدم-
وانتى اللى كان قربك دليل ..
تحضنى جنة بسمتك-
ترفعنى فوق لألف ميل
ونطير نطير..
.. إنتى العروسة المدهشة
وأنا الأمير
أه يا حبيبتي من الأسى -
بيضيع هنا العمر القليل
وبينفرط عقد الصباح..
وبنحصد الأيام سراب
وأنا كنت باحلم بالكثير..
أنا كنت باحلم بالكثير ..
.....
يانيل يانيل .. يانيل يانيل..
يا با العجوز الشاب وضاء الجبين
يا طرب كل المجروحين....
بانه عليك فى كل صبح وكل ليل-
.. تفتح بيبانك تانى ، تسمح باللقا
البسمة ديلها الشقا
والروح زوت ، وانت السبيل
يانيل يانيل
يانن عيني يابو العطا-
إسمح بقى ، ورد روح العطشانين


الحب داء والكذب داء...
وانا ابتليت بالحب ورفضت الدواء...!
تخسرني بالكذب الغبي وعدم الوفاء..
تكسبني بالصدق المنور إنتماء....
واحكم يا قاضى العدل واصدق فى الميزان -
باكسب كثير - أيوه - لكنى باخسر كام ؟..
وبكام أنا - بعت السنين والإبتسام ؟..
وبكام وكام....
لاطلعت فوق ولا بقيت على المقام..
هو أنا المذكور عالية..
هو أنا المذكور دانيه..
هو أنا .. هو أنا..
مطحون ما بين السرعتين -
الإنتماء والإنقسام
مين اللى يقدر ينسجم بالإندام..
مين يرضى يتلون سخام
ويزيد حمول المروى طين..
دارى يا حلوة الدمعتين..
دارى يا حلوة الدمعتين..
ماتكشفيش ضعفى
الحق ده صاحبي والصدق ده ولفى..
أنا كدة مولود مصاب -
أجرب بلون الحق وبعطر التراب
أنا كده عاشق أمل
وضيعوه الجراحين..

أنا كده عصفور وطار -
غاب وانطلق ..
فات قلبه مسجون الديار -
باحلام ورق ..
لفيت كثير .. كثير كثير
ولقيتني في نفس المدار -
صحن القلق
بتتسرق مني السنين ..
وحدى بالف الدايرتين ..
حواليا ناس بوشوش صحيح -
لكن قلوبهم ممسوخين ..
خيالات بشر -
باعوا في ليل الغربة أحلى عمرهم -
بالدرهمين
جف الوتر
والسوق مزاد فيه العجب ..
السوق سيق ، ويحكموه النحاسين ..
جف الوتر ..
والسوق مزاد ، عرض وطلب ..
وأنا رهين المطلبين :
نصي الحكيم بيقوللى "عيش"
ويجلى الفكر الحكيم ،
نصي الحزين ..

١٩٩١/٦/٢٢

لما نتعلم ضميرها

بكرة تبقى الشمس أحلى ..
والسنين تجدل شعورها
بكرة يابا الضحكة تبقى ..
والقلوب تقدر تنوّلها
بكرة يبقى الحرف أذكى ..
والنجوم نقدر نطولها
بكرة تانى - الكلمة تانى ..
من بعيد نسمع طبولها
تبقى عربية الأغاني ..
والولاد تعرف مصيرها
بكرة تبقى الشمس يابا ..
لما نتعلم ضميرها



107